

Kuyantika 1

Yobi

Kuyantika 2

Kuyantika 3

Kuyantika 4

Kuyantika 5

Kubasika-Levi

Kutanga-Kulonga

Yozue

Bazuzi-Ruti

1 Samuele,

2 Samuele, 1 Bansangu

1 Bantotila

2 Bantotila, 2 Bansangu

Daniele, Ezekiele



Photo: www.freebibleimages.org/Sweetpublishing Matondo!

Daniele ti Ezekiele

(Baleso 12 sambu na bana ti bajeune)

Musoniki: *Mama Lorella Rouster. MCE*
Edition 2022



Le Projet MWINDA—Ministères pour Chaque Enfant

ecmafrica@ecmafrica.org

BAMVULA 70 NA BABYLON

Ngindu ya nene ya baleso yai:

KIKESA kukonda LULENDO. Beto bantu ya Nzambi lenda zinga ti tuba na kikesa, sambu beto zaba nde Nzambi kele na lukanu ya mbote ya muntu lenda bebisa ve. Kansi beto zinga ve na lulendo, sambu beto zaba nde kele beto ve ya ke yala, kansi Nzambi.

Moniteur, NB ! Kana nge kele na Bible, nge lenda tanga histoire ya mvimba na preparation. Kansi na meso ya bana, tangila bo kaka bitini ya beto me tula. Beto me katula bima ya nkaka sambu na kumisa histoire nkufi.

Mukanda yai kele na baleso yai :

Partie I. Profete Ezekiele

Leso 1- Nzambi songaka Ezekiele nsudi ya masumu ti zuzema ya Nzambi. Ezekiele 4:9-17

Leso 2- Lulendo--Nzambi songaka Ezekiele kisina na yo ti zuzema yo ta benda. Ezekiele 28:1-17

Leso 3- Nzambi songaka Ezekiele nde kele Nzambi ya pesa moyo na bantu ya kufwa. Ezekiele 37:1-13

Partie II. Profete Daniele

Leso 4- Kikesa kusola nzila ya Nzambi konso sika nge kele, mambu ve nki bantu ya nkaka kele kusala. (Daniele ti banduku na yandi buya madia ya Mfumu ya nene.)

Daniele 1

Leso 5- Kikesa kusosa ngangu ya Nzambi kaka, sambu beto zaba nde Nzambi zaba mambu yonso.

Daniele 2

Leso 6- Kikesa kubuya bisambu ya banzambi ya luvunu Daniele 3 (Kiteki ya Nebokadonazore)

Leso 7- Lulendo ya Nabukodonozore (Vision of a tree cut down), ndola na yandi ti restoration na yandi Daniele 4

Leso 8- Lulendo ya Belshazzar ti ndola na yandi Daniele 5

Leso 9- Kikesa na Bisambu (Daniele na dibulu ya bantambu) Daniele 6

Leso 10 -Visio ya Daniele—Bimfumu ta nwana, Muntu ya Mbi ta yala fioti, kansi Nzambi ta yala na nsuka. Daniele 7

Leso 11-Wanzio Gabriele songaka Daniele ntangu ya kukwisa ya Mesia Daniele 9

Leso 12- Nzambi songaka Daniele nde mambu yonso ya ta kwisa, yo kele na maboko na Yandi. Daniele 10-12

Partie I. Profete Ezekiele

Leso 1- Nzambi songaka Ezekiele nsudi ya masumu ti zuzema ya Nzambi.

Ezekiele 4:9-17

I. PREPARATION SAMBU NA MONITEUR-

Kuyidika na ntwala : Nata mbuma ya luku to ya nkwanga

☉ Kikuma ya Leso :

Bana bakisa nde mbala mingi beto bantu mona masumu bonso mambu ya nene ve, kansi Nzambi mona yo makambu mpenza.

♥ Verse ya Kulonguka :

Beto yonso, beto kele bonso bantu ya mvindu. Ata mambu ya mbote ya beto ke salaka, yo kele kaka bonso bilele ya mvindu. Sambu na mbi na beto, beto kele bonso matiti ya kuyuma yina ya mupepe ke nata ntama. Yezaya 64:5

👁️ Bankunga ya kwenda nzila mosi ti lesu :

Mawa, Mawa Kuvanda Mwana-Satana
Yezaya 53 :6

II. REVISION

† Kuyindula diaka baleso me luta :

Beto me longuka nde ata na nima Nzambi fwaka bantu na Yandi Israele sambu na masumu na bo, bantu ya Yuda landaka kusala mbi. Ndambu bamfumu landaka Nzambi, kansi mingi landaka Yandi ve. Yo yina, na bilumbu ya Mfumu Yoyakina, Nzambi pesaka bambeni nzila kubedisa bo. Bambeni kangaka bapofete Ezekiele ti Daniele ntangu yina ti nataka yandi na Babilonia. Yandi mpi kumaka mpika ya bantu ya Babilone. Daniele ti Ezekiele vandaka na Babilone ntangu basoda ya Babilonia vutukaka na Yuda diaka. Ntangu yina, bo ziungaka Yeruzalemi tii ntangu madia yonso manaka. Bo fwaka bwala yina ti tulaka yo tiya.

III. KULONGA LESO YAI

➔ Kuyantika :

Ezekiele vandaka profete penepene na bilumbu ya nsuka ya Yeruzalemi. Yandi bendaka bantu kuvutuka na Nzambi, kansi bantu mingi waka yandi ve. Ntangu yai, beto ke mona yandi na bilumbu yina ya nsuka, na ntwala yandi kwendaka na Babilonia.

🏠 Malongi ya nene ya lesu yai (developpement) na banti 4 :

1.1 Nzambi sonaka Ezekiele nde yandi sala madia bonso luku, yandi kotisa ntufi ya muntu, yandi kudia yo. Ezekiele 4 :12

📖 Tangila bana baverse yai :

12 (Nzambi ke tuba na Ezekiele) Nge ta baka kabine ya bantu, nge tula yo tiya, ebuna nge yokila yo mampa. Na nima nge ta dia yo na meso ya bantu yonso.

? Yula bana

- Moniteur, songa bana ndambu ya luku to nkwanga nge me nata. Yula bo nde, kana bo zabaka nde ntufi ya muntu vandaka na kati, keti bo ta dia yo.

✍️ Bana sala bageste to mwa-senete

👁️ Bana yimba ti kina

1.2 Yai ke songa nde bantu fweti dia bima ya mvindu kaka kuzinga ntangu Babilonia ta ziunga bwala na bo. Ezekiele 4 :13

📖 Tangila bana baverse yai :

13 Mfumu Nzambi tubaka diaka nde : « Ntangu Mono ke panza bantu na bantoto ya nzenza, yai kele mutindu bo ta diaka madia yina ya nsiku ke buyaka. »

? Yula bana

✍️ Bana sala bageste to mwa-senete

👁️ Bana yimba ti kina

1.3 Ezekiele zolaka ve, ebuna Nzambi pesaka yandi nzila kusadila tufi ya ngombe na sika ya tufi ya muntu. Ezekiele 4:14-15

📖 Tangila bana baverse yai :

14 Kansi mono (Ezekiele) tubaka nde: “Kele ve Mfumu...Katuka kileki na mono, mono me diaka ntete ve...madia yina kele ya mbi. »

15 Ebuna Nzambi nde : « Kele mbote. Mono ke pesa nge kabine ya ngombe, nge ta yokila mambu na nge. »

? Yula bana

 **Bana sala bageste to mwa-senete**

 **Bana yimba ti kina**

1.4 Bantu ya Yeruzalemi ta fwa sambu na masumu na bo. Yo vandaka makambu ya nene na meso ya Nzambi. Ezekiele 4 :16-17

 **Tangila bana baverse yai :**

16 Yandi tubaka diaka nde : « Nge, muntu, Mono ke pesa diaka ve bantu ya bwala Yeruzalemi mampa. Bo ta vanda na boma ti mpasi...

17 Ya kieleka, bo ta zwa mampa ve, masa mpi ve. Bo ta tula diaka tima ve, ebuna bo ta fwa sambu na masumu na bo. »

? Yula bana

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Nzambi vandaka kusonga Ezekiele nde masumu ya bantu ya Yeruzalemi, bo monaka yo kima ya fioti. Kansi Nzambi monaka yo nsudi ti mvindu, bonso kima Yandi lendaka kusimba ve. Yo pesaka Nzambi nzala ya kuluka bonso kana muntu fweti kudia ntufi. Yo yina, zuzema fweti simba bo. Masumu kele mambu ya nene na meso ya Nzambi !

 **Devoir sambu na bakristo :**

Bana bakristo, bantu ya zaba Nzambi ve, bo mona masumu kima ya fioti, bonso bantu ya Yeruzalemi. Kansi beto bakristo bakisa nde yo kele kima ya Nzambi ke zola ve ata fioti. Mposho yai, bika beto tina masumu. Kana beto bwa na disumu, beto ndima yo nswalu ti lomba Nzambi yika beto ngolo kubika yo.

Invitation sambu na bo ya me yamba Yesu ntete ve :

Mbala ya nkaka nge me yamba Yesu ntete ve bonso Mvulusi na nge sambu nge me bakisa ntete ve nde masumu na nge me kotisa nge na makambu ti Nzambi. Masumu kele ve kaka nde nge kele parfait ve. Masumu kele makambu. Nsuka na yo kele lufwa.

Kana nge telama na ntwala ya Nzambi kukonda Yesu Kristo, Yandi ta mona nge bonso tufi. Nsudi. Mvindu.

Kansi ata masumu na nge kele nsudi ya mbi na Nzambi, Yandi zola nge. Yandi tindaka Mwana na Yandi Yesu Kristo sambu na nge. Yesu fwaka na sika na nge. Masumu yonso ya nsudi ya nge, Yesu bakaka yo na zulu na Yandi. Yandi futaka mfuka ya nge zolaka kufuta na Nzambi sambu na yo.

Na nima, Yandi telamaka na lufwa, sambu bantu yonso bakisa mbote nde Nzambi me ndima nkailu na Yandi.

Yesu me sila nde, konso muntu yina kwisa na Yandi, Yandi ta buya yandi ve (Yoane 6 :37b). Kana nge me kwisa na Yandi ntete ve, o, kwisa na Yandi bubu yai. Balula ntima ti tula kivuvu yonso na Yandi kaka. Nge ta kuma mwana na Yandi!

NSUKA YA LESO 1

Leso 2 Lulendo ya bamfumu-- Nzambi songaka Ezekiele kisina na yo ti zuzema yo ta benda.

Ezekiele 28:1-17

I. PREPARATION SAMBU NA MONITEUR-

🕒 Kikuma ya Leso :

Beto tina lulendo sambu beto bakisa nde kisina na yo keke Satana.

♥ Verse ya Kulonguka :

*(Nzambi ke tuba na Mfumu ya Tire, mpi na Satana):
Nge kumaka lulendo mingi sambu na kitoko ti
lukumu na nge. Nge kumaka nkutu kusala mambu
bonso muntu ya maladi ya kilau. Yo yina Mono
losaka nge na ntoto... Ezekiele 28:17*

👂 Bankunga ya kwenda nzila mosi ti lesu :

Kudikumusa na meso ya Nzambi
Mo' Ta Kwisa na Nzambi na Lulendo Ve

II. REVISION

† Kuyindula diaka baleso me luta :

Na lesu me luta, beto monaka Ezekiele na ntoto na yandi, Yuda, na ntwala zuzema ya Nzambi bwaka na bwala na yandi. Bambuka nde na ntangu ya Mfumu Yoyakini, bambeni kangaka bapofete ya Nzambi bonso Ezekiele, bo nataka bo na nsi ya ntama—nsi ya Babilonia. Kuna na Babilonia, Nzambi pesaka Ezekiele bavisio ya songaka yandi mambu mingi. Bubuyai beto ke mona visio mosi ya Nzambi songaka yandi kuna.

III. KULONGA LESO YAI

➔ Kuyantika :

Nzambi songaka Ezekiele mpila Nzambi ta pesa ndola na bantwadisi ya mbi—bantwadisi ya bantu na yandi Yuda, ti bantwadisi ya bansi ya nkaka. Bubuyai, beto ta mona ndola to zuzema ya Nzambi ta pesa Mfumu ya bwala mosi zina ya Tire.

🏠 Malongi ya nene ya lesu yai (developpement) na banti 4 :

2.1 Nzambi songaka nde mfumu ya Tire vandaka lulendo mingi. Yandi kuditulaka

kuvanda bonso Nzambi, ata yandi vandaka kaka muntu. Ezekiele 28 :1-2

📖 Tangila bana baverse yai :

1 Mfumu Nzambi tubaka na mono nde :

2 « ...Songa mfumu ya bwala Tire mambu ya Mono Mfumu Nzambi ke tuba nde : 'Nge ntotila ya Tire, nge ke tula lulendo, nge ke tuba nde nge keke bonso Nzambi. Nge ke tuba mpi nde nge me vanda na zulu ya kiti ya kimfumu bonso Nzambi....nge ke kuditula na kuvanda bonso Mono Nzambi, kansi nge keke muntu. Nge keke Nzambi ve.'

? Yula bana

✍ Bana sala bageste to mwa-senete

👂 Bana yimba ti kina

2.2 Yandi waka lulendo sambu yandi vandaka mayele ti mvwama. Ezekiele 28:3-5

📖 Tangila bana baverse yai :

3 'Nge ke yindula nde nge me luta Daniele na mayele, kinsweki yonso nge me zaba yo.

4-5 Mayele na nge me kumisaka nge mvwama mpenza. Kisalu na nge ya kuteka bima me yikaka nge wolo ti arza mingi. Ebuna nge me kuma lulendo sambu na kimvwama na nge yai yonso.'

? Yula bana

✍ Bana sala bageste to mwa-senete

👂 Bana yimba ti kina

2.3 Zuzema ta kwisa. Nzambi ta sadila banzenza sambu na kulumusa yandi. Ezekiele 28:6-10

📖 Tangila bana baverse yai :

6-7 Ntangu yai, Mono Mfumu Nzambi ke tuba nde : 'Sambu nge ke yindula nde nge keke mayele bonso Nzambi, Mono ke natila nge bambeni ya nku mpenza na kwisa kunwanisa nge, bo ta fwa bima na nge yonso ya nge bakaka na mayele.

9 Ntangu bo ta kwisa kufwa nge, keti nge ta tuba diaka nde nge keke bonso Nzambi ?....

? Yula bana**✚ Bana sala bageste to mwa-senete****👁️ Bana yimba ti kina****11.4 Nzambi songaka nde kisina ya lulendo na yandi vandaka nkwa-lulendo yonso, Satana.**

Ezekiele 28:11-17

📖 Songa bana nde bo kuwa mbote, bo nangula diboko ntangu bo kuwa bandinga ya kele kutuba kaka na Mfumu ya Tire ve, kansi na Satana. Tangila bana baverse yai :

Kidimbu 🖐️ ke songa partie ya ke tuba sambu na Satan.

11 Mfumu Nzambi tubaka na mono diaka nde:

12 “...Yimba nkunga ya mafwa sambu na ntotila ya bwal Tire. Songa yandi mambu ya Mono Mfumu Nzambi ke tuba nde: ‘Ntete nge vandaka muntu mosi ya mbote mpenza. Nge vandaka mayele mingi ti kitoko mingi.

13 🖐️ Nge vandaka kuzinga na Edeni, kilanga ya Nzambi. Nge vandaka kulwata matadi ya ntalu...

14 🖐️ ...Nge vandaka kuzinga na zulu ya ngumba na Mono Nzambi ti kutambula na kati ya matadi yina ke pela.

15 🖐️ Bifu na nge vandaka mbote (ntete)...tii na kilumbu ya nge yantikaka kusala mbi.

16 🖐️ ...nge vandaka kusala mambu ya nku ti masumu. Yo yina, Mono katulaka nge na zulu ya ngumba na Mono...

17 🖐️ Nge kumaka lulendo mingi sambu na kitoko ti lukumu na nge...Yo yina Mono losaka nge na ntoto sambu nge vanda bonso malongi na bantotila ya nkaka.

? Yula bana**✚ Bana sala bageste to mwa-senete****👁️ Bana yimba ti kina****>< Kumanisa Malongi :**

Nzambi songaka profete Ezekiele kusonga Mfumu ya Tire nde Nzambi ke zuze yandi, Nzambi ke pesa yandi ndola. Sambu na nki ? Sambu yandi

kuditulaka bonso yandi vandaka Nzambi. Lulendo ya ngolo, ya mbi ! Nzambi songaka mpi nde kisina ya lulendo yina kele Satana. Nzambi salaka yandi mbote, kansi na lulendo, yandi zolaka kuditula na sika ya Nzambi Yandi mosi. Nzambi katulaka Satana na zulu sambu na lulendo na yandi. Nzambi ta katula Mfumu ya Tire na kimfumu na yandi mpi, yonso sambu na lulendo na yandi. Kele ve Nzambi ke pesa bantu lulendo. Kisina na yo kele Satana.

🖐️ Devoir sambu na bakristo :

Beto bakristo! Beto sala atasio. Beto tina lulendo. Beto kudikumumusa na ntwala ya Nzambi ya salaka beto. Yandi kele Nzambi, ti beto kele bantu na Yandi.

✚ Invitation sambu na bo ya me yamba Yesu ntete ve :

Mbala mingi, Satana ta sadila lulendo kukanga beto nzila kukwisa na Yesu Kristo. Yandi ta songa beto nde beto ke na mfunu ya Yesu ve, nde beto kele ndambu mbote, nde beto mosi lenda kudiguluka. Yai yonso kele luvunu na yandi.

Beto kele bankwa masumu. Masumu me natila beto lufwa ti makambu ti Nzambi. Bible songa pwelele nde muntu lenda guluka ve na mambu ya mbote yandi sala. Kaka menga ya Yesu Kristo, Mwana ya Nzambi, lunga kugulusa beto.

Kuwa ve mabanza ya Satana. Kudikumumusa na ntwala ya Nzambi bubuyai. Balula ntima na Yandi ti ndima nde nge kele na mfunu ya Yesu Kristo. Kana nge yamba Yandi, Yandi mpi ta yamba nge bonso mwana na Yandi.

NSUKA YA LESO 2

Leso 3- Nzambi songaka Ezekiele nde kele Nzambi ya pesa moyo na bantu ya kufwa.

Ezekiele 37:1-13

I. PREPARATION SAMBU NA MONITEUR-

Kuyidika na ntwala : Kana yo lenda monika sosa mukwa ya mbisi ya kuyuma. Nge ta sadila yo kuyantika lesa.

☉ Kikuma ya Leso :

Beto bakisa nde Nzambi ya pesaka moyo lenda pesa yo diaka ata beto me fwaka. Yandi ta tedimisa bantu na lufwa.

♥ Verse ya Kulonguka :

Nzambi tedimisaka Mfumu Yesu na lufwa, ebuna Yandi ta tedimisa beto mpi na ngolo na Yandi Nzambi. 1 Korinto 6 :14

👤 Nkunga ya kwenda nzila mosi ti lesa :

Mono Zola na Nzo Kitoko--
yika verse yai: Yandi ta tedimisa beto
Ya mene kufwaka (3x)
Beto ta zinga diaka !

II. REVISION

† Kuyindula diaka baleso me luta :

Beto me mona mpila Nzambi songaka Ezekiele mambu, nki ta kwisila bamfumu. Yandi songaka yandi nde mfumu mosi vandaka na probleme ya lulendo. Lulendo yai me katuka wapi ? Kisina na yo, Satana yandi mosi, mbeni ya Nzambi. Yandi vandaka wanzio ya kitoko ti ya mbote, kansi yandi bwaka, yandi kumaka mbeni ya Nzambi na nzila ya lulendo.

III. KULONGA LESO YAI

➔ Kuyantika :

Bubuyai beto ta yindula visio ya nkaka ya yituka ya Nzambi songaka Ezekiele. Mono banza nde muntu me mona visio bonso yo ntete ve. Yo tadilaka dibengi fuluka na mikwa ya kuyuma. [Moniteur, kana mukwa ikele, songa yo na bana. Yula keti yo kele na moyo. Keti yo lenda tambula yo mosi.]

🏠 Malongi ya nene ya lesa yai (developpement) na banti 4 :

3.1 Nzambi songaka Ezekiele dibengi fuluka na mikwa ya kuyuma. Yandi yulaka keti mikwa yina ta zinga diaka. Ezekiele 37 :1-3

📖 Tangila bana baverse yai :

1 Mfumu Nzambi simbaka mono, ebuna Mpeve na Yandi nataka mono na dibengi mosi ya kifuluka na mikwa.

2 Yandi tambusaka mono ndambu na ndambu ya dibeni na kati ya mikwa. Mono monaka nde kuna kuvandaka na mikwa mingi mpenza, yo mpi vandaka ya kuyuma.

3 Yandi tubaka na mono nde : «...Keti mikwa yai lenda zinga diaka ? » Mono tubaka nde : « Mfumu Nge mpamba lenda pesa mvutu. »

? Yula bana

👤 Bana sala bageste to mwa-senete

👤 Bana yimba ti kina

3.2 Nzambi songaka Ezekiele kutuba na mikwa yina sambu bo zinga diaka. Yandi salaka yo, ebuna misisa ti misuni kwisaka kufika mikwa. Ezekiele 37:4-8

📖 Tangila bana baverse yai :

4-5 Yandi tubaka nde, «... Songa mikwa yai... nde: “Mono ke pesa beno moyo, ebuna beno ta zinga diaka.”

6 Mono ke pesa beno misisa ti misuni ti kufika beno mukanda ya nitu. Mono ke pesa beno moyo, ebuna beno ta zinga diaka. Mpidina, beno ta zaba nde Mono kele Mfumu Nzambi.

7-8 Yo yina, mono tubaka na mikwa mutindu Mfumu Nzambi songaka mono. Ntangu mono vandaka ke tuba, mono waka makelele, ebuna mono monaka mikwa ke kangama kisika mosi...ke fika mikwa. Kansi moyo vandaka ve na bamvumbi yina.

? Yula bana

👤 Bana sala bageste to mwa-senete

👤 Bana yimba ti kina

3.3 Nzambi songaka Ezekiele kutuba na mupepe, yo kwisa kota bamvumbi. Yandi salaka yo, ebuna bo yantikaka kuzinga diaka. Ezekiele 37: 9-10

 **Tangila bana baverse yai :**

9 *Ntangu yai, Nzambi tubaka na mono nde :
« ...Songa mupepe mambu ya Mfumu Nzambi me tuba nde, yo katuka na ndambu yonso, yo kwisa kukota na bamvumbi, ebuna bamvumbi kuzinga diaka. »*

10 *Yo yina, mono tubaka mutindu Nzambi songaka mono. Mupepe kotaka na bamvumbi, ebuna bo telamaka, bo yantika kuzinga diaka...*

? **Yula bana**

 **Bana sala bageste to mwa-senete**

 **Bana yimba ti kina**

3.4 Yai zolaka kutuba nde ata Israele me fwaka bonso nation, Nzambi ta tedimisa yandi diaka. Ezekiele 37 :11-14 **Na Kuwakana ya Mpa beto longuka nde Yandi ta tedimisa mpi bantu yonso na lufwa.** 1 Korinto 6 :14

 **Tangila bana baverse yai :**

Ez. 37 :11 *Mfumu Nzambi tubaka na mono diaka nde: “...Bantu ya Israele kele bonso bamikwa yai. Bo ke tuba nde bo me yuma...*

12 *Yo yina... Songa bo mambu ya Mono Mfumu Nzambi ke tuba nde: ‘Mono ke kangula maziamu na beno... Mono ke vutula beno bantu na Mono na ntoto na beno Israele...*

14 *Mono ta pesa beno moyo na Mono, ebuna beno zinga diaka. Mono ta vutula beno na ntoto na beno. Ebuna beno ta zaba nde Mono kele Mfumu Nzambi. Mono tubaka nde Mono ta sala mambu yai, ebuna Mono ta sala yo mpi... »*

1 Korinto 6 :14 *Nzambi tedimisaka Mfumu Yesu na lufwa, ebuna Yandi ta tedimisa beto mpi na ngolo na Yandi Nzambi.*

? **Yula bana**

 **Bana sala bageste to mwa-senete**

 **Bana yimba ti kina**


>|< **Kumanisa Malongi :**

Nzambi pesaka moyo, yo yina Yandi kele na kiyeka ti na ngolo ti vutula yo diaka, ata misuni yonso me mana ti mvumbi na beto me kuma mikwa ya kuyuma kaka. Nzambi tubaka nde ata masumu ya Israele me natila bo lufwa, Yandi ta tedimisa bo ti vutula bo na nsi na bo diaka.

Nzambi songaka ngolo na Yandi kutedimisa muntu na lufwa ntangu Yandi tedimisaka Yesu Kristo. Yandi me sila mpi nde kiteso mosi, lumbu ta kwisa nde Yandi ta tedimisa beto yonso.

 **Devoir sambu na bakristo :**

Bana bakristo, keti dibanza ya lufwa ke pesa nge boma? Beto bakristo fweti vanda na boma ve, sambu lufwa kele ve nsuka. Ata mikwa na beto kuyuma yonso, beto zaba nde Nzambi ta tedimisa beto sambu beto zinga diaka, nitu ti moyo, na Kimfumu na Yandi. Beto vutula Yandi matondo.

 **Invitation sambu na bo ya me yamba Yesu ntete ve :**

Kansi, kana nge ke landa nzila ya Yesu ve, lufwa lenda vanda boma. Bible ke tuba nde Yesu ta tedimisa bantu na lufwa mbala zole. Ya ntete, ntangu Yesu vutuka kubaka bantu na yandi. Ya zole, na nima, na ntangu ya zuzema. « *Nzambi sambisaka bantu ya kufwa...Nzadi-mungwa vutulaka bantu ya kufwa yina fwaka na masa. Lufwa ti nsi ya bantu yina me fwaka, yo vutulaka mpi bantu na yo. Ebuna Nzambi sambisaka bantu yonso...Bo losaka na dizanga ya tiya, lufwa ti nsi ya bantu yina me fwaka. Dizanga yina ya tiya kele lufwa ya zole. Konso muntu yina ya bo sonikaka zina na yandi na mukanda ya moyo ve, bo losaka yandi na dizanga ya tiya. (Kusonga 20 :12b-15).*

Nzambi zola ve nge kwenda kuna. Yandi pesaka Mwana na Yandi ya kitoko Yesu Kristo na mpila nde nge lenda kota na bwala na Yandi ti zinga na kintwadi ti Yandi mvu ya mvu.

Keti nge ta zenga bubuyai kubalula ntim ti kukota na nzila na Yandi ?

NSUKA YA LESO 3

Partie II. Profete Daniele

Leso 4—KIKESA kusola nzila ya Nzambi konso sika nge kele, mambu ve nki bantu ya nkaka ke sala.

Daniele 1

KIKESA ! Boma ve !

Disongidila ya bandinga yai: (*Longi tendula, ebuna bana repeter.*)

KIKESA kele kutula ntima nde Nzambi ta sala sambu na bantu na Yandi na mpila nde, na nsuka yonso ta vanda mbote sambu na beto. Yo yina, na ntangu ya mpasi, ti yandi lenda mona ngolo kusala mbote.

BOMA kele contraire ya Kikesa. Boma ke kuwa na ntima nde Nzambi ta sala ve na mpila ya ta sadisa beto. Yo yina, na makambu ya kele mpasi kuzenga, muntu kuwa boma kusala yina ya kele mbote.

I. PREPARATION SAMBU NA MONITEUR-

☉ Kikuma ya Leso:

Na nsuka na lesa yai, bana ta zenga na ntima kulanda Nzambi, sambu bo ta bakisa nde Nzambi lenda pesa beto kikesa kulanda nzila ya Nzambi konso sika beto kele.

♥ Verse ya kulonguka:

[Atasio, moniteur ! Na baleso yonso, partie ya verse sambu na bana prescolaire kele souligne bonso yai.]

Daniele zengaka na nsi ya ntima nde : « Mono lenda dia ve madia ti kunwa vinu ya ntotila, mbaimbai mono ta bebisa bansiku na beto ya bisambu. »... Daniele 1 :8a

👤 Bankunga ya kwenda nzila mosi ti lesa :

Daniele Sambaka Mingi Vs.1
Kikesa Kele

II. REVISION

† Kuyindula diaka baleso me luta :

Bantu ya Yuda salaka mbi ti sambaka banzambi ya luvunu. Nzambi tindilaka bo baprofete mingi kuvutula bo na nzila, kansi bo buyaka. Na ntangu ya Mfumu Yoyakimi, Nzambi pesaka nzila nde Mfumu ya Babylone kukanga ndambu bantu ya Yuda, kunata bo na Babylone. Bo kuna bampika na

yandi. Na kati vandaka muntu mosi ya mbote zina ya Daniele. Baleso yai ke songa luzingu na yandi na Babylone.

III. KULONGA LESO YAI

➔ Kuyantika Leso :

Ntangu mono tuba ndinga “Kikesa,” nge yindula nki? (Longi, pesa bana mpila ya kuvutula mvutu.) Bantu mingi yindula bantu bonso basoda. Bo yindula mambu bonso kuvanda kikesa kunwana na mvita. Yina kele kikesa ya mutindu mosi.

Kansi, bana mingi kele na boma ya mambu ata na nzo-nkanda. Bo ke na boma nde bo ta nunga ve, ebuna bo zola kutula ngolo mingi ve. Bo kele na boma nde bo ta zaba ve mvutu ya mbote. Yo yina, bo yindula nde bo fweti tala mvutu ya muntu ya nkaka, to bo fweti sala tricherie na nzila ya nkaka. To, bo kwenda kufuta mbongo kusosa nkisi ya ngolo ya lenda pesa bo nzila kununga.

Bana ya nkaka ke na boma kusala na mpila ya banduku na bo ke landa ve. Bo mona bonso bo fweti sala kiteso mosi bonso bantu ya nkaka.

🏠 Malongi ya nene ya lesa yai (developpement) na banti 3 :

4.1 Ata Daniele vandaka mpika na nsi ya nkaka, yandi zengaka kulanda nzila ya Nzambi. (*Daniele 1 :2-8*)

📖 Tangila bana baverse yai :

2 Mfumu Nzambi pesaka Yoyakimi na maboko ya (mfumu ya nene ya Babilone... Yandi) nataka bantu ya yandi kangaka na nsi ya Babilonia...

3-4 (Yandi) tubaka na... mfumu ya bantu na yandi nde: “Na bantu ya Israele ya beto kangaka, nge sola bana-babakala ...ya kitoko...bana ya mayelempidina bo ta ...sala kisalu ya nzo ya mono ntotila. Nge...ta longa bo kutanga ti kusonika ndinga na beto bantu ya Babilonia.”

5 Ntotila tubaka mpi nde... bana yango fweti dia madia ...ti kunwa vinu ya yandi... Bo...longa bo bamvula tatu, na nima bo kwisa songa bo na ntotila.

6 Na kati ya bana yina ya bo solaka kuvandaka Daniele (ti banduku 3 na yandi)...

8 Daniele zengaka na nsi ya ntima nde:
 “Mono lenda dia ve madia ti kunwa vinu ya
 ntotila, mbaimbai mono ta bebisa bansiku na
 beto ya bisambu.” ...

? Yula bana

- Sambu na nki Daniele vandaka na nsi ya nkaka Babilonia ?
 (Basoda ya Babilonia nwanisaka Yeruzalemi. Daniele vandaka na kati ya bantu ya bo kangaka ti nataka bo na Babilonia kuvanda bampika na bo.)
- Mfumu ya Babilonia zolaka bana ya bakala kusala nki ?
 (Kusala kisalu ya nzo na yandi.)
- Bo solaka nani ?
 (Daniele ti banduku 3 na yandi.)
- Madia ya mfumu vandaka mbote. Sambu na nki Daniele buyaka yo ?
 (Mbaimbai yandi bebisa bansiku ya bisambu na bo baYuda.)

✍ Bana sala bageste to mwa-senete

Pona mwana mosi kusala bonso Daniele. Bana ya nkaka sala bonso bo ke natila yandi madia mingi ya mbote ya mfumu. Daniele buya yonso kutuba nde : « Mono fweti bambuka bansiku na beto ya bisambu. »

🔊 Bana yimba ti kina

Daniele Sambaka Mingi vs. 1

4.2 Daniele lombaka mfumu ya kisalu kutesa lukanu na bo bilumbu kumi.

(Daniele 1 :9-14)

📖 Tangila bana baverse yai :

9-10 (Kapita ya nzo... tubaka na Daniele nde:
 “Mono ke tina ntotila boma... kana nitu na nge kuvanda ve bonso ya bana ya nkaka, yandi lenda fwa mono.”

11-12 Ntangu yai Daniele... tubilaka yandi nde:
 “Meka beto bilumbu kumi, pesa beto kaka ndunda ti masa ya kunwa.

13 Na nima nge ta tala nitu na beto ti nitu ya bana yina ke dia madia ya ntotila, ebuna nge ta zaba kuzenga mutindu nge ta mona beto.”

14 Yandi ndimaka na kumeka bo bilumbu kumi.

? Yula bana

- Daniele lombaka kapita ya nzo kusala nki ?
 (Kutesa bo bilumbu 10, na nima kutala mpila bo kele.)
- Na bilumbu 10, bo ta dia madia ya mfumu ve, kansi bo ta dia nki ?
 (Ndunda ti masa)
- Kapita ndimaka to yandi buyaka ?
 (Yandi ndimaka.)

✍ Bana sala bageste to mwa-senete

Mwana mosi tanga tii na kumi (ata kikongo, ata français), bu bana ya nkaka sala bageste bonso bo ke dia ndunda, ke nwa masa.

🔊 Bana yimba ti kina

Daniele Sambaka Mingi Vs. 1 diaka

4.3 Nzambi nungisaka bo na kutesa yina, ti Yandi sakumunaka bo na kulonguka yonso na bo. 1 :15-20

📖 Tangila bana baverse yai :

15 Na nima ya bilumbu kumi, bo lutaka bana yonso... na kitoko ti na ngolo.

16 Yo yina, (kapita) ndimaka na kupesa bo kaka (madia na bo).

17 ...Nzambi pesaka bo ngangu ya kisalu ya mikanda, ti mayele ya kuyindula mambu. Yandi pesaka Daniele mpi mayele ya kutendula bandosi.

18 Ntangu bamvula tatu me lunga, (kapita ya kisalu) nataka bana-bakala yonso na ntwala ya ntotila.

19 Ntotila... monaka bo kuluta bana ya nkaka na mayele. Yo yina, bo kumaka kusala na nzo ya ntotila.

20 Na konso mambu... ya ntotila vandaka kuyula bo, yandi monaka nde mayele ya bana yai iya me luta mbala kumi mayele ya banganga-ngombo ti ya banganga-nkisi yonso ya kimfumu na yandi.

? Yula bana

- Na nsuka ya bilumbu 10, bo vandaka ngolo to ngolo ve ?
(Ngolo)
- Na nsuka ya bamvula 3 ya kulonguka, bo vandaka mayele to mayele ve ?
(Mayele kuluta banganga-ngombe ti banganga-nkisi yonso.)

Bana sala bageste to mwa-senete

Bana songa bageste kusonga 1) ngolo ya nitu, ti 2) mayele.

Bana yimba ti kina

Daniele Sambaka Mingi Vs. 1 diaka

>|< Kumanisa Malongi :

Nzambi pesaka Daniele kikesa kubuya madia ya Ntotila, ya landaka ve bansiku ya bisambu ya Nzambi me pesa bo. Nzambi sadisaka yandi kutuba na luzitu ti na mayele. Nzambi sadisaka yandi ti banduku na yandi kulonguka mbote. Kieleka, Yandi sakumunaka bo.

✋ **Devoir sambu na bakristo :**

Nzambi ta sadisa beto bakristo mpi, kana beto zenga na ntima yonso kulanda Yandi. Mwana mukristo, keti nge me zenga na ntima kulanda Yesu na konso sika ya nge kele ?

✝ **Invitation sambu na bo ya me yamba Yesu ntete ve :**

Kubalula ntima na Yesu mpi ke lomba nde nge zenga na ntima kulanda Yandi. Mpeve ya Nzambi ntete fweti benda nge. Kana nge kuwa nde Yandi ke benda nge, nge mpi fweti sala partie na nge. Balula ntima. Yai ke zola tuba nde nge zola kubika masumu, nge yantika kulanda Yandi. Kana nge bakisa nde Yesu kele Mwana ya Nzambi tindaka, nde Yandi fwaka na zulu ya kulunsi sambu na mbi ya nge me sala, nde Yandi telamaka na lufwa, nge lenda binga zina na Yandi. Yandi ta pesa nge moyo ya mpa.

Nkunga ya Nsuka: Kikesa Kele

NSUKA YA LESO 4

LESO 5--KIKESA kusosa ngangu ya Nzambi kaka, sambu Nzambi zaba mambu yonso.

Daniele 2

I. PREPARATION YA MONITEUR

☉ Kikuma ya Leso :

Bana ta zaba nde Nzambi lunga songa beto konso mambu ya beto ke na mfunu ya kuzaba. Bo ta buya kusosa ngangu na nzila ya banganga ngombo to magie. Bo ta sosa ngangu na Nzambi kaka, sambu Yandi zaba mambu yonso.

♥ Verse ya Kulonguka :

“Lukumu na Nge Nzambi tii kuna. Nge kele mayele mingiNge...ke tulaka bantotila ti kukatula bo....Nge...ke songaka mambu ya kinsweki, mambu yina ya muntu lenda zaba ve... Daniele 2:20-22

II. REVISION

‡ Kuyindula diaka baleso me luta :

Daniele vandaka Muyuda ya zolaka Nzambi mingi. Mfumu ya Babilonia kwisaka kunwanisa bwala na yandi, Yeruzalemi. Yandi kangaka Daniele ti nataka yandi ntama na Babilonia kumaka mpika. Kansi Daniele zengaka na ntima nde yandi ta landa kaka Nzambi. Mfumu zolaka kupesa yandi madia ya landaka ve bansiku ya bisambu ya Bayuda. Daniele lombaka nde bo pesa yandi kaka ndunda ti masa. Nzambi sakumunaka yandi na nitu ya ngolo. Bo longaka yandi ndinga ti mayele ya Babilonia, ti Nzambi sadisaka Daniele kulonguka. Yandi lutaka bantu yonso na mayele.

👂 Bankunga ya kwenda nzila mosi ti leso :

Daniele Sambaka Mingi Vs 1 & 2
Kikesa Kele

➔ Kuyantika Leso :

Koko vandaka na mawa sambu foto mosi special me vila. Yandi yantikaka kudyula: “Nani bakaka yo?” Yandi yindulaka ti yindulaka. Na nsuka, yandi kwendaka na nganga ngombo mosi kuyula makambu yina. Nganga ngombo yina lombaka yandi kufuta mbongo, ti bima ya nkaka. Koko futaka bima yonso, ebuna nganga ngombo kwendaka kuyula bampeve ya yandi sadilaka.

Yandi tubaka nde nduku ya Koko, zina ya Kwesi muntu me baka foto yina.

Koko wilaka Kwesi makasi mingi. Yandi fundaka Kwesi. Kwesi tubaka nde yandi zabaka mambu yina ve. Koko ti Kwesi, bo vandaka kunwana na bandinga mingi. Ebuna kinduku na bo, yo manaka. Bo yonso zole monaka mawa mingi.

Na nima ya bilumbu, Koko kangulaka mukanda mosi kutanga yo. A! Foto yina, yo bwaka na ntoto. Nswalu, yandi bambukaka nde yandi mosi me tula yo na kati ya mukanda yina. Foto na yandi me monika, kansi Koko vandaka na kiese ve ata fioti. Yandi me losaka mbongo mingi mpamba na nganga ngombo. Yandi me fwaka kinduku ti Kwesi, ti yandi me vanda bonso maladi sambu na makasi ti kumenga na yandi. Ntangu yina, Koko bambukaka bandinga ya Bible, na mukanda ya Daniele: “Mambu ya mutindu yai ya kinsweki, kaka Nzambi ya zulu Muntu ke songaka yo.” (Daniele 2:28)

A! Mbote kana yandi sosaka Nzambi kubambukisa yandi wapi yandi me tula foto! Mbote kana yandi me kwenda ve na nganga ngombo yina! Mbote yandi bakisaka nde, Nzambi ya zaba mambu yonso, Yandi zola sadisa bana na Yandi.

Transitio kukota lesu ya Bible:

Na lesu na beto bubuyai, beto ta mona nde, mbala mosi, Daniele mpi vandaka na mfunu kuzaba mambu mosi ya kinsweki. Nki mutindu yandi lenda zaba mambu yina, mambu ya muntu lenda kuzaba ve? Nki lenda sadisa Daniele na mambu yai?

III. KULONGA LESO YAI

🏠 Malongi ya nene ya lesu yai (developpement) na banti 4 :

5.1 Bamagicien ya Babilonia monaka ve mpila kusonga mfumu ndosi na yandi ti disongidila na yo. (Daniele 2 :1-12)

📖 Tangila bana baverse yai :

1-2 ... (Mfumu) ...lalaka ndosi. Ndosu yango pesaka yandi mpasi mingi...Yo yina yandi bingaka bakonseye na yandi yonso: banganga-ngombo, banganga-nkisi, bantu yina ke tubaka mambu ta kwisa na ntwala... sambu bo... tendula yandi ndosi yina....

3 Yandi tubaka na bo nde: “Mono me lala ndosi mosi ke pesa mono mpasi...”

4 Bo tubilaka ntotila...nde: “Mfumu...Songa beto ndosi na nge ebuna beto ta tendula yo.”

5 Ntotila tubaka na bo nde: “...kana beno songa mono ve ndosi **ti** disongidila na yo, bo ta zenga beno bitini-bitini....”

6 Kansi kana beno songa mono ...yo, mono ta pesa beno bakado ti lukumu... Ntangu yai...beno songa mono yo.”

7,11 Bakonseye tubaka diaka nde: “Mfumu pardo, kana nge songa beto ndosi yango, beto ta zaba kutendula yo.”.....Mfumu, pardo, mambu ya nge ke yula beto yo kele mpasi mingi; ata muntu mosi ve lenda sala yo...


12 Ntangu yai ntotila ...waka makasi mingi, yandi tubaka nde bo fwa bantu yonso ya mayele ya nsi ya Babilonia.

? Yula bana

- Mfumu zolaka bamagicien kusala nki ? (Kusonga yandi ndosi na yandi ti disongidila na yo)
- Sambu na nki mfumu waka makasi na bo ? (Sambu bo lenda sala yo ve.)

Bana sala bageste to mwa-senete

Bana sala bageste ya ke songa boma ya bamagicien sambu bo monaka ve mpila kusonga mfumu ndosi na yandi.

 Bana yimba ti kina bandinga ya mfumu: “Songa mono ndosi! Songa mono ndosi!

5.2 Bu Daniele waka mambu yina, yandi sosaka Nzambi. Nzambi waka yandi ti songaka yandi ndosi yina. *Daniele 2 :13-23*

Tangila bana baverse yai :

14-15Daniele ...yulaka ...nde: “Sambu na nki ntotila me zengila bantu ndola ya ngolo ya mutindu yai? (Mfumu ya basoda ya nzo) telaka Daniele mambu yonso...

16 Daniele kwendaka nswalu kulomba nzila ya ntotila nde yandi pesa yandi mwa-ntangu...

17-18 Daniele vutukaka na nzo, yandi songaka mambu yonso na banduku na yandi...Yandi nde: “Beto samba Nzambi... Yandi... tendudila beto ndosi yina...

19-21 Kilumbu yo yina... Nzambi songaka Daniele ndosi yina, ebuna Daniele kumisaka Nzambi ...nde: “Lukumu na nge Nzambi tii kuna, nge kele mayele mingi ti ngolo mingi....Nge ke tulaka bantotila ti kukatula bo....

22- 23 Nge...ke songaka mambu ya kinsweki...ya muntu lenda zaba ve....

Nzambi...mono ke pesa Nge mersi, mono ke pesa Nge lukumu. Nge...me pesa mono mayele ti ngolo. Nge me ndima mambu ya beto lombaka, nge me songa mono nki beto fweti tuba na ntotila.”

? Yula bana

- Nki mutindu Daniele me kwisa kuzaba ndosi ya mfumu ? (Yandi sambaka Nzambi, ti banduku na yandi. Ebuna Nzambi songaka yandi ndosi yina.)

Bana sala bageste to mwa-senete

Bana sala bageste bonso bo ke lomba Nzambi kusonga bo ndosi ya mfumu.

Bana yimba ti kina

Daniele sambaka mingi, vs. 1 & 2

5.3 Daniele songaka ndosi na mfumu ti tendulaka yo. Mfumu monaka kiteki ya nene ya bametayi mutindu na mutindu. Ditadi bulaka makulu, ebuna yonso panzanaka. Yai songaka nde bimfumu ya nkaka ta landa yina ya Babilonia. Na nsuka Nzambi ta yala mvu ya mvu. *Daniele 2 :24-45*

Tangila bana baverse yai :

24-27Nswalu (bo) nataka Daniele na ntotila....Daniele...nde: “Mfumu, ata muntu mosi ya mayele, ata nganga-nkisi, ata nganga-ngombo...bo lenda songa nge mambu yai ve.

28 Mambu ya mutindu yai ya kinsweki, kaka Nzambi ya zulu... ke songaka yo. Yandi me songa nge, mfumu... mambu yina ta kwisa na ntwala....

31-33 Mfumu, nge vandaka kumona kiteki mosi ...ya nda....Ntu na yo vandaka na kusala na wolo-wolo, (nitu na nsi na bibende ya nkaka ya

ntalu). Makulu na yo yonso vandaka ya kusala ndambu ...na kibende, ndambu... na ntoto.

34 Ntangu nge vandaka ke tala kiteki, ditadi ya nene katukaka yo mosi na ngumba mosi, yo kwisaka kubwila kiteki na makulu na yo...Yo panza-panzaka yo.

35-36 Na mbala mosi (kiteki yonso), yo bukanaka kitini-kitini..... Kansi ditadi yina bwilaka kiteki, yo kumaka ngumba ya nene....Yo yai ndosi ya nge lalaka, mfumu. Ntangu yai, wa disongidila na yo.

37-38 Mfumu...Nzambi ya zulu...tulaka nge ntotila, Yandi mpi...pesaka nge kimfumu, ngolo ti lukumu. Yandi... tulaka nge na kiyala bantu yonso....Ntu yina ya wolo keke nge, mfumu.

39-40 Na nima ya kimfumu na nge, kimfumu ya nkaka ta vanda.....Na nima, kimfumu ya nkaka... ta vanda....


44-45 (Na nsuka), Nzambi ya zulu ta tula Ntotila mosi yina ta yalaka tii kuna....Ditadi yina ya nge monaka...yo ke songa nge mfumu mutindu mambu ta bwa na ntwala. Nzambi ya nene...ta sala yo.

? Yula bana

- Daniele songaka mfumu nde yandi monaka nki—kiteki to mbisi ? (Kiteki ya nda)
- Kiteki yina vandaka kusonga yandi nki—madia to bimumu ?
- Nzambi zolaka nde mfumu bakisa nki—nde yandi ta fwa mbasi, to nde Nzambi ta yala mvu ya mvu ? (Nzambi ta yala mvu ya mvu.)

Bana sala bageste to mwa-senete

Bana tala na zulu bonso bo ke tala kiteki ya nda.

 Bana yimba ti kina:

Daniele Samaka Mingi Vs. 1 & 2

5.4 Mfumu ndimaka bandinga ya Daniele. Yandi pesaka lukumu na Nzambi, ti yandi pesaka Daniele sika ya lukumu. Daniele 2 :46-49

 **Tangila bana baverse yai :**

46-47 Ntangu yai, ntotila... fukamaka na ntwala ya Daniele....Yandi tubilaka Daniele nde: “Nzambi na nge me luta banzambi yonso ya nene, Yandi keke Ntotila ya bantotila, Yandi muntu ke songaka mambu ya kinsweki....”


48 Yandi kumisaka Daniele muntu ya lukumu, yandi pesaka yandi bakado mingi ya kitoko...

? Yula bana

- Mfumu monaka nde Nzambi keke nki ? N... (Ntotila ya bantotila)
- Yandi pesaka Daniele nki ? (Lukumu ti bakado)

Bana sala bageste to mwa-senete

Bana sala bageste bonso bo keke mfumu ke pesa lukumu na Nzambi.

 Bana yimba ti kina

Nkunga yai: Daniele sambaka mingi, vs 1 & 2

>|< Kumanisa Malongi :

Daniele sosaka Nzambi kuzaba ndosi ya mfumu na yandi, ti disongidila na yo. Yo songaka mambu ya bimumu ya ntoto. Mbala mingi, bimumu ya nene bonso ya Babilone, bo monaka bonso bo vandaka na kiyeka yonso. Bonso bo vandaka Nzambi ya ta yala mvu ya mvu. Nzambi songaka Daniele nde ndosi yina songaka nde keke Nzambi ke pesa kiyeka na bantu. Bimumu ya ntoto ta vanda mingi, kansi na nsuka, Nzambi Yandi mosi ta yala, Ntotila ya bantotila tii kuna.

Devoir sambu na bakristo :

Beto bakristo vanda bantu ya ke sosa mayele ya Nzambi, kansi ya bamagicien ve. Beto zaba nde Nzambi zaba mambu yonso, ata mambu ya ta kwisa na nima. Na mposo yai, beto sosa mayele ya Yandi.

Invitation sambu na bo ya me yamba Yesu ntete ve :

Kana nge me yamba Yesu ntete ve bonso Mvulusi na nge, Nzambi zola nge kuzaba ti kubakisa mambu yai: Kukonda Yesu, nge lenda kuguluka ve. Kukonda Yesu, nge lenda kwenda ve na bwala ya Nzambi. Nge lenda vanda na kinduku ve ti Nzambi.

Nge ke na mfunu na Yandi. Yandi zola nge. Yandi fwaka na zulu ya kulunsi sambu na kugulusa nge na masumu. Yandi me telama na lufwa; Yandi kele na moyo bubu, ebuna Yandi lenda gulusa nge kana nge ta binga zina na Yandi.

Kana nge me binga Yandi ntete ve kulomba Yandi kugulusa nge, keti nge ta binga Yandi bubuyai? Mono ta vanda awa na nima ya classe, ti mono ta vanda na kiese kusadisa konso nani zola ndima Yesu bubuyai.

Nkunga ya nsuka : Kikesa Kele

NSUKA YA LESO 5

LESO 6—KIKESA kubuya bisambu ya luvunu

Daniele 3

I. PREPARATION SAMBU NA MONITEUR-

☉ Kikuma ya Leso :

Bana ta bakisa nde Nzambi zola ti sosa bisambu na beto yonso, luzolo na beto yonso, kulemfuka na beto yonso. Kaka Yandi ke lunga kubaka yina yonso, sambu kaka Yandi gangaka beto ti pesaka beto moyo. Yo yina, bana ta buya kusamba to kusosa banzambi ya nkaka. Bo ta pesa luzolo na bo yonso ti bisambu na bo yonso na Mfumu Nzambi Mpungu kaka.

♥ Verse ya Kulonguka :

*Mono muntu kele Mfumu Nzambi,
Yo yina zina na Mono!*

*Lukumu na Mono, Mono ta pesa
yo ve na nzambi ya nkaka,
Ata na biteki mpi ve! Yezaya 42:8*

🗨️ Bankunga ya kwenda nzila mosi ti leso :

Banzambi ya nkaka
Nani kele ngolo?

II. REVISION

† Kuyindula diaka baleso me luta :

Nzambi pesaka Daniele makabu ya kutendula nki? (Bandosi)
Daniele songaka nani ndosi na yandi? (Mfumu ya nene ya Baylonia)
Ndosi yina songaka nde Kimfumu ya nani ta yala tii kuna? (Kimfumu ya Nzambi)

III. KULONGA LESO YAI

➔ Kuyantika Leso:

Bakristo mingi samba Nzambi kana yonso ke salama na mpila ya mbote. Kansi kana ntangu ya mpasi kwisa, kana bo mona nde Nzambi ke pesa ve nswalu mvutu ya bisambu yina ya bo ke sosaka, bo yantika kusosa bampeve ya nkaka kusadisa bo.

Na lesu ya bubu, beto ta mona bantu ya vandaka kwikama kusamba kaka Nzambi, ata ntangu ya mpasi vandaka na ntwala na bo.

🏠 Malongi ya nene ya lesu yai (developpement) na banti 4 :

6.1 Mfumu tedimisaka kiteki ti songaka nde, kana bo kuwa misiki, bantu yonso samba yo. Ndola kana muntu buya : lufwa na tiya.

Daniele 3 :1-6

📖 Tangila bana baverse yai :

1-2 Ntotila... salaka kiteki mosi ...ebuna yandi tedimisaka yo...Ntangu yai yandi bingaka bantu yonso...na kwisa kisika mosi....bo ke sala fete ya kiteki ya yandi...

3 Bo yonso kwisaka sambu na fete yango, bo telamaka na ntwala ya kiteki yango.

4 Muntu mosi ...vandaka kubula tango tubaka na ndinga ya ngolo nde: “Beno yonso, ata beno kele nki dikanda to nki ndinga,

5 ntangu beno ta wa makelele ya...miziki, beno yonso beno fweti fukama ti kusambila kiteki ...ya ntotila ...me tedimisa.

6 Konso muntu yina ta fukama ve to ta sambila ve kiteki, bo ta losa yandi...na furu ...ya tiya...”

? Yula bana

- Ntotila Nabukodonozore tedimisaka nki?
(Kiteki mosi ya nene)
- Bana, nki beno banza ? Keti Nzambi ndima nde bantu na yandi samba biteki ?
(Ikele ve. Nsiku ya zole Nzambi pesaka bo vandaka kusala biteki ve.)
- Ntangu bantu waka misiki yina, bo fweti sala nki?
(Bo fweti fukama ti sambila kiteki.)
- Kana muntu kusambila kiteki ve, nki ta vanda ndola na yandi?
(Bo ta yoka yandi tiya.)

👉 Bana sala bageste to mwa-senete

Bana tala na zulu bonso bo ke tala kiteki ya nda. Bo tuba ve, “Kusamba biteki, ve, ve, ve!”

🗨️ Bana yimba ti kina

Nkunga ‘Banzambi ya Nkaka’

6.2 Banduku ya Daniele Shadraki, Meshaki ti Abedi-Nego buyaka kusamba kiteki, yo yina bantu fundaka bo na mfumu. Mfumu songaka bo diaka kusamba yo, kansi bo buyaka diaka.
Daniele 3 :7-18

 **Tangila bana baverse yai :**

7 Ebuna ntangu bantu waka ...miziki...bo yonso fukamaka, bo sambilaka kiteki...

8-11 Na ntangu yo yina, bantu ya nkaka... kwendaka kufunda Bayuda na ntotila... Bo tubilaka yandi nde: "...ke na Bayuda yai Shadraki, Meshaki ti Abedi-Nego...bo me zitisa ve nsiku na nge mfumu.... »

13-14 Ntotila Nabukodonozore waka makasi mingi mpenza, yandi tubaka nde: "Beno kwisa kunata bantu yina tatu awa na mono!" Ntangu bo kumaka... yandi tubaka na bo nde : " ...Keti ya kieleka beno ke buyaka na kusamba nzambi na mono...kufukama na ntwala ya kiteki ya mono...?"

15 Ntangu yai, kana beno wa diaka... miziki, beno fukama, beno sambila kiteki. Kana beno buya...bo ta baka beno ti kulosa beno...na furu...ya tiya... Keti beno ke yindula nde ...Nzambi...lenda gulusa beno...?"

16-17 (Bo) vutulaka nde: "Mfumu...Nzambi yina ya beto ke sadilaka, kana Yandi zola gulusa beto na tiya ti na maboko na nge, Yandi ta gulusa beto kaka.

18 Kansi ata Yandi gulusa beto ve, mfumu, zaba nde beto ta samba nzambi na nge ve, beto ta fukama mpi ve na ntwala ya kiteki yina..."

? Yula bana

- Shadraki, Meshaki, ti Abed-Nego buyaka kusala nki ?
(Kusamba kiteki ya mfumu)

 **Bana sala bageste to mwa-senete**

Bana repeter nde : « Beto ta samba kiteki ve ! »

 **Bana yimba ti kina**

Nkunga 'Banzambi kele Ngolo'

6.3 Na makasi, Mfumu songaka basoda, bo losaka Daniele ti banduku na tiya ya ngolo. Kansi na nima, yandi monaka bantu iya na kati

ya tiya, bo kele kutambula. Yo yina, yandi katulaka bo. Yandi monaka nde tiya me sala bo kima ve. Daniele 3 :19-27

 **Tangila bana baverse yai :**

19 Ntangu yai ntotilailungi na yandi kumaka mbwaki, yandi waka makasi mingi sambu na (bo). Yandi songaka bantu na yandi nde: "Beno tula tiya mingi mbala nsambwadi...!"

20 Ebuna yandi songaka mpi basoda na yandinde: "Beno kanga bana yai tatu bansinga, beno losa bo na kati ya tiya..."

21-22 Basoda kangaka bo bansinga ti bilele na bo yonso ya bo vandaka na yo na nitu:bo losaka bo na furu...Tiya lutanaka mingi, yo yokaka bantu yina nataka bana-Bayuda.

23 Shadraki, Meshaki ti Abedi-Nego...bwaka na kati-kati ya tiya.

24 Ntangu yai ntotila ...yitukaka, yandi telemaka na mbala mosi ti kuyula bantu na yandi nde: "Keti beno me losa ve na tiya bantu tatu ya beto kangaka bansinga?" Bantu na yandi vutulaka nde: "E mfumu, yo kele mpidina."

25 Ntotila nde: "Ebuna ntangu yai, sambu na nki mono ke mona bantu iya ke tambula-tambula na kati ya tiya? Bo kele ya kukanga ve, bo mpi ke monika ve nde bo ke wa mpasi, ebuna muntu ya iya ke monika bonso wanzio."

26 Ebuna ntotila....bingaka...: "Shadraki, Meshaki, Abedi-Nego, beno bantu ya Nzambi-Mpungu, beno kwisa kubasika!" Nswalu bo kwisaka kubasika.

27 Bantu yonso ya nene ya ntotila...kwisaka kisika mosi na kutala bantu yai kupiaka ve tiya. Bansuki na bo ti bilele na bo yo piaka tiya ve; bo vandaka kubasika mpi ata nsudi ya tiya ve.

? Yula bana

- Nki salamaka ntangu mfumu losaka Shadraki, Meshaki ti Abed-Nego na kati ya tiya ?
(Yandi monaka nde bo vandaka kutambula na kati ya tiya ti muntu ya nkaka vandaka ti bo.)

- Ntangu bo basikaka, mfumu monaka nki ?
(Tiya sala vo kima ve.)

Bana yimba ti kina

Bana kina na kiese sambu Nzambi gulusaka bana na Yandi na tiya. Nkunga : Nani Kele Ngolo ?

6.4 Mfumu kumisaka Nzambi sambu kaka Yandi kele sala kimpa mutindu yina.

Daniele 3:28-33

Tangila bana baverse yai :

28 Ntotila tubaka nde: “Lukumu na Nzambi... Yandi me tinda wanzio na Yandi na kwisa kugulusa bantu yai ke sambaka Yandi....

29 Yo yina, mono ke tula ntangu yai nsiku nde bantu yonso...kana yandi tuba mambu ya mbi sambu na Nzambi ya Shadraki, Meshaki ti ya Abedi-Nego, muntu yina (fweti baka ndola). Nzambi ya nkaka kele ve yina lenda gulusa bantu mutindu yai.”

30 Ebuna ntotila...pesaka Shadraki, Meshaki ti Abedi-Nego bisalu ya kuluta lukumu...

31-32 Ntotila... tindaka ndinga na bantu yonso ...nde :«Mono ke tubila beno...Nzambi-Mpungu.... Yandi ke sala bidimbu ya nene mpenza ! Nzambi kele mfumu tii kuna, kimfumu na Yandi mpi ta mana ve. »

? **Yula bana**

- Na nsuka, mfumu bakisaka nki sambu na Nzambi ?
(Yandi ke sala bidimbu ya nene. Kimfumu na Yandi ke suka ve.)

Bana sala bageste to mwa-senete

Bo kuwa bonso bo ke sosa nsudi ya tiya na bana yai, kansi bo kuwa nsudi ve. Bo bula maboko.

Bana yimba ti kina

Nkunga ‘Nani Kele Ngolo?’

>< **Kumanisa Malongi :**

Shadraki, Meshaki, ti Abeg-Nego, bo me zenga na ntima kulanda kaka Nzambi. Yo yina, bo buyaka

kusamba kiteki. Ndola vandaka ngolo—bo losa bo na tiya ya nene. Kansi Nzambi me luta ngolo ya tiya yina. Yandi tindaka wanzio kuvanda ti bo na kati ya tiya, ti Yandi basisaka bo na mpasi yina.

Devoir sambu na bakristo :

Kana nge zaba Yesu, mambu mingi ta benda nge kusambila banzambi ya nkaka. Banzambi ya nkaka lunga ve kubaka bisambu ti luzolo na beto, sambu bo kele ve Nzambi ya gangaka beto ti pesaka beto moyo. Keti nge ta zenga kuzola ti kusamba Mfumu Nzambi Mpungu, Yandi kaka, yantika mposo yai?

Invitation sambu na bo ya me yamba Yesu ntete ve :

Mbala ya nkaka nge zaba Yesu ntete ve. Yandi zola nge kuvanda na fami na yandi. Kana nge me ndima Yandi ntete ve, Yesu ke kinga nge kuzenga mambu yina. Bubuyai, keti nge ta tuba “Ee” na Yandi? Kana nge ke na mfunu ya lusadisu na mambu yina, kaka kusonga mono na nima ya classe, to konso ntangu nge ta mona mono na mposo yai. Mono ta vanda na kiese ya mingi kusadisa nge kukangula ntima na nge na Yesu.

NSUKA YA LESO 6

Leso 7--KIKESA, Lulendo Ve

Daniele 4

I. PREPARATION SAMBU NA MONITEUR-

Kusala na ntwala : Na lesa 1-3, beto me pesa suggestions sambu na bakestio kuyula bana, bageste bo lenda sala, ti kitini to mwa-nkunga bo lenda yimba na nima ya konso kitini ya lesa. Yantika lesa yai, nge mosi moniteur yindula bima yina na ntangu nge kele kuyidika lesa.

☉ Kikuma ya Leso :

Bana bakisa nde beto kele bantu, beto kele Nzambi ve.

♥ Verse ya Kulonguka :

*Beno vila ve nde Mfumu Nzambi kele Nzambi !
Yandi Muntu salaka beto. Beto kele ya Yandi. Beto kele bantu na Yandi... Bankunga 100 :3*

🔊 Bankunga ya kwenda nzila mosi ti lesa :

Daniele Sambaka Mingi Vs. 1 & 2
Mo' Ta Kwisa na Nzambi na Lulendo Ve

II. REVISION

† Kuyindula diaka baleso me luta :

Daniele me kuma mpika na nsi ya Babilonia. Mfumu kuna vandaka ntu-ngolo. Yandi me mona nde Nzambi songaka serviteur na Yandi Daniele bandosi na yandi, ata bamagicien na yandi vandaka ve na mpila kuzaba yo. Yandi me mona nde Nzambi lundaka baserviteur na yandi ata bo losaka bo na tiya ya nene. Na yina yonso, yandi pesaka Nzambi lukumu.

III. KULONGA LESO YAI

➔ Kuyantika Leso :

Kansi bubu yai, beto ta mona nde tii ntangu yina, mfumu vandaka kunwana na ntima nani kele nzambi. Yandi yindulaka ntangu ya nkaka nde yandi mosi vandaka Nzambi. Hmm.

🏠 Malongi ya nene ya lesa yai (developpement) na banti 4 :

7.1 Mfumu lalaka ndosi ya zole ya bamagicien lendaka ve kutendula. Yo yina yandi bingaka diaka Daniele. Daniele 4 :1-15

📖 Tangila bana baverse yai :

Mfumu ya Babilone ke tuba : 2-4...*Mono lalaka ndosi mosi ya boma...bantu yonso ya mayele, banganga-ngombo....bo kukaka ve kutendudila mono yo.*

5-8...*Daniele...kwisaka kukota....mono telaka yandi ndosi ya mono...mono monaka nti mosi ya nda-nda...(yo) vandaka kuyela kaka...na mpila nde bantu yonso...kumona yo.*

10-11 ...*mono monaka ...wanzio me katuka na zulu...yandi tubaka ...nde : « Beno bwisa nti yai. Beno zenga-zenga balutangu na yo...*

12 *Kansi kitini ya nti yina me bikala...beno bikisa yo mpidina. Beno ziungisa ya shene...Kitini ya nti yina ...kele bonso muntu. Malulu kubwila muntu yina, yandi zinga bonso bambisi na matiti.*

13-14 *Yandi ta vanda diaka ve na ntima ya kimuntu, kansi na ntima bonso mbisi bamvula 7...mpidina bantu yonso fweti zaba nde Nzambi-Mpungu ke yalaka bamfumu yonso ya nsi-ntoto.*

? Yula bana

✍ Bana sala bageste to mwa-senete

🔊 Bana yimba ti kina

7.2 Ntendula pesaka Daniele mpasi, kansi Nzambi pesaka yandi kikesa kutendula yo. Daniele 4 :16-24

📖 Tangila bana baverse yai :

16-19 *Ntangi yai Daniele...kumaka kisakasaka mpenza, yandi monaka kima ya kutuba ve. Ntotila ...nde : '...kuwa boma ve sambu na ndosi.' Daniele...nde : 'Mfumu, a kana ndosi ti disongidila na yo vandaka sambu na bambeni na nge !...Mfumu, nti yina kele nge...*

21 *Mfumu, wa...disongidila ya ndosi na nge. Yai kele mambu ya Nzambi-Mpungu me*

songa...ta bwilaka nge...Mpidina nge ta ndima nde Nzambi-Mpungu ke yalaka bamfumu yonso ya nsi-ntoto.

? Yula bana

✚ Bana sala bageste to mwa-senete

👤 Bana yimba ti kina

7.3 Mvula mosi na nima, Mfumu salaka lulendo kutuba nde yandi mosi me tunga Babilone na ngolo na yandi. Yandi kuditulaka bonso Nzambi. Yo yina, zuzema simbaka yandi mpila Daniele me tuba. Yandi salaka bamvula 7 kuzinga bonso mbisi. Daniele 4 :25-30

📖 Tangila bana baverse yai :

Mfumu ya Babilonia tubaka :

25-27 Mambu yai yonso bwilaka mono. Bangonda 12 lutaka. Ntangu mono vandaka kwenda kutambula...mono tubaka nde : 'A bwala Babilone kele nene ! Mono muntu tungaka yo na ngolo na mono mosi...

28 Ntangu mono me manisa ntete ve kutuba, mono waka ndinga na zulu ke tuba nde : « Mfumu...Ntangu yai kimfumu na nge ke mana...

29 Bo ta kula nge na kati ya bantu. Nge ta zingaka kisika mosi ti bambisi ya mfinda. Nge ta diaka matiti bonso bambisi ya mfinda...bonso ngombe bamvula 7, tii kuna nge ta ndima nde Nzambi-Mpungu ke yalaka bamfumu yonso ya nsi-ntoto...

30 Nswalu mambu yina bwaka mpi mutindu yo yina.....nsuki na mono kumaka nda-nda bonso mansala ya ndeke, manzungulu na mono kumaka mpi nda-nda bonso manzungulu ya ndeke.

? Yula bana

✚ Bana sala bageste to mwa-senete

👤 Bana yimba ti kina

7.4 Na nima ya bamvula 7, mayele ya kimuntu vutukaka na mfumu, ti yandi ndimaka nde

Nzambi kele Nzambi Mpungu mvu ya mvu. Ebuna Nzambi vutulaka yandi na kimfumu na yandi. Daniele 4 :31-34

📖 Tangila bana baverse yai :

...Ntangu bamvula ...7 me mana, mono...talaka na zulu. Mono kudizabaka nde mono me kuma diaka muntu. Mono tubaka nde : « Nge Nzambi-Mpungu, Nge Nzambi yina ke zingaka tii kuna. Mono ke pesa Nge mersi. Mono ke kumisa Nge. Nge Muntu ta yalaka ntangu yonso. Kimfumu na Nge ta mana ve tii kuna.

34 Ntangu yai, mono...ke samba Mfumu ya zulu....Mambu yonso ya Yandi ke salaka kele ya kieleka ti ya mbote. Yandi ke kulumusaka bantu yina ke tulaka lulendo.

? Yula bana

✚ Bana sala bageste to mwa-senete

👤 Bana yimba ti kina

>< Kumanisa Malongi :

Mfumu ya Babilonia vandaka ntu-ngolo. Yandi zolaka kumonika bonso Nzambi. Nzambi pesaka yandi atasio na ndosi, nki ta salama kana yandi tula lulendo. Kansi na nima ya mvula mosi, yandi salaka lulendo kutuba nde yandi mosi me sala kimfumu na yandi yonso, kuzaba ve nde Nzambi me pesa yandi yo. Mbala mosi, ndola ya Nzambi simbaka yandi mutindu Yandi tubaka. Mfumu yai ya nene ya Babilonia, yandi kumaka kuyindula ti kusala bonso mbisi. Nsoni ! Nzambi kulumusaka yandi ngolo ! Kansi na nima ya bamvula 7, Nzambi vutulaka yandi mabanza ya kimuntu diaka. Na nlemvo ya Nzambi, Yandi vutulaka mfumu ya Babilonia na kimfumu na yandi. Mbote beto zaba nde beto kele bantu, ti Nzambi Ngangi ya me sala beto.

👤 Devoir sambu na bakristo :

Bana bakristo, beto tina lulendo. Beto pesa Nzambi sika ya nene, ya ntete na luzingu na beto. Yandi lunga na kubaka sika yina.

✝ Invitation sambu na bo ya me yamba Yesu ntete ve :

Na nsuka mono ke tuba na nge, kana nge me yamba Yesu Kristo ntete ve. Keti lulendo ke kanga nge nzila kuyamba Yandi? Keti nge ke mona bonso nge kele mbote, nge ke na mfunu na Yandi ve ?

Kana mpidina, zaba nde beto kele bankwa-masumu na ntwala na Yandi. Bible ke tuba nde mambu yonso ya mbote beto lenda sala, yonso kele bonso bilele ya mvindu, ya nsudi na meso na Yandi. Kuwa profete Yezaya, 64:5 : *Beto yonso, beto kele bonso bantu ya mvindu. Ata mambu ya mbote ya beto ke salaka, yo kele kaka bonso bilele ya mvindu...* Kaka muntu ya lenda sadisa probleme yai kele Yesu Kristo. Na lufwa na Yandi, Yandi manisaka mfuka yonso ya beto na ntwala na Yandi. Yandi bakaka masumu na beto sambu Yandi lenda pesa beto lunungu na Yandi. O, kuinga diaka ve. Mbote kubinga zina na Yandi bubuyai, Yandi gulusa nge.

NSUKA YA LESO 7

Leso 8. Nzambi songa yo diaka-- Kikesa, Lulendo Ve

Daniele 5

I. PREPARATION SAMBU NA MONITEUR-

Kuyidika na ntwala :

Yindula nki bakestio nge ta yula, nki bageste bana ta sala, nki kitini ya nkunga bo ta yima na nima ya konso nti ya malongi ya lesu.

☉ Kikuma ya Leso :

Mambu yai kele mfunu mingi kubakisa, yo yina, Nzambi songa yo diaka nde, beto bakisa nde beto kele bantu, beto kele Nzambi ve. Beto vanda na kikesa bonso bantu ya Nzambi, kansi beto tula lulendo ve.

♥ Verse ya Kulonguka : Beto baka diaka---

*Beno vila ve nde Mfumu Nzambi kele Nzambi !
Yandi Muntu salaka beto. Beto kele ya Yandi. Beto kele bantu na Yandi... Bankunga 100 :3*

👁️ Bankunga ya kwenda nzila mosi ti lesu :

Daniele Sambaka Mingi Vs. 1 & 2
Mo' Ta Kwisa na Nzambi na Lulendo Ve

II. REVISION

† Kuyindula diaka baleso me luta :

Beto me mona lulendo ya mfumu ya Babilone mosi. Yandi tubaka nde yandi mosi me sala bwala ti kimfumu na yandi. Yo yina, Nzambi kulumusaka yandi tii kukuma kukwenda na ntoto bonso mbisi. Kansi na nima ya bamvula 7, Nzambi kangulaka mabanza na yandi kubakisa nde yandi vandaka Nzambi ve. Ebuna Nzambi vutulaka yandi na kimfumu.

III. KULONGA LESO YAI

➔ Kuyantika Leso :

Ntangu me luta, Na kapu 5 ya mukanda ya Daniele, beto mona nde mfumu ya mpa kele kuyala. Mfumu yai kele ntekolo ya mfumu ya ntete. Zina na yandi Baltazare. Keti Mfumu Baltazare mpi ta mona probleme ya lulendo ?

🏠 Malongi ya nene ya lesu yai (developpement) na banti 4 :

8.1 Na lulendo, Mfumu Baltazare sadilaka makopa ti bawolo ya bo me botula na nzo-Nzambi sambu na fete. Yandi sadilaka yo sambu na kumisa banzambi mutindu na mutindu. Ntangu yina, yandi monaka diboko kusonika na kibaka. Daniele 5 :1-6

📖 Tangila bana baverse yai :

1-2 Kihumbu mosi, ntotila Baltazare salaka fete mosi ya nene....(yandi) tubaka nde bo kwisa kunata makopa ti babolo...na yandi botulaka na Nzo-Nzambi...na Yeruzalemi.

4 Ntangu yai, bo yantikaka kuyimba bankunga sambu na kukumisa banzambi na bo (mutindu na mutindu).

5-6 Na mbala mosi, bo monaka diboko ya muntu ke sonika na kibaka ya nzo...kisika bamwinda vandaka kupela mingi. Ntangu ntotila monaka diboko ke sonika, boma simbaka yandi mingi na mpila nde yandi kumaka kisakasaka. Mabolongo na yandi yantikaka kutekita.

? Yula bana

✍️ Bana sala bageste to mwa-senete

👁️ Bana yimba ti kina

8.2 Bamagicien na yandi monaka ve mpila kutendula yo, ebuna mama na yandi songaka bo kubinga Daniele. Bo nataka yandi na ntwala ya mfumu sambu na kutendula kusonika na kibaka. Daniele 5 :7-12

📖 Tangila bana baverse yai :

*7-9 Yandi tubaka na ndinga ya ngolo nde :
« Beno kwenda kubinga banganga...ngombo...Muntu yina ta kuka kutanga bisono yai ti kutendula yo, mono ta lwatisa yandi bilele ya kimfumu...yandi ta vanda mpi muntu ya tatu na kimfumu na mono. » Bantu yonso ya mayele kwisaka, kansi ata muntu mosi ve kukaka kutanga bisono ti*

kutendula yo. Ebuna...Baltazare, boma simbaka yandi diaka ya kuluta...

10-12 Mama ya ntotila...yandi mpi kwisaka kukota. Yandi tubaka nde : « ...Kuwa boma ve...Ke na muntu mosi....kele kikesa mingi ti mayele mingi na kutendula bandosi ti mambu yina kele mpasi na kuzaba, ti mambu ya kinsweki. Muntu yai zina na yandi Daniele...yandi ta songa nge disongidila ya mambu yai. »

? Yula bana

 **Bana sala bageste to mwa-senete**

 **Bana yimba ti kina**

8.3 Daniele tendulaka nde kusonika yina ke songa zuzema ya Nzambi sambu na lulendo ya mfumu. Nzambi ke kabisa kimfumu na yandi. Yandi ta pesa ndambu na yo na bantu ya nsi ya Media, ti ndambu na nsi ya Persia. Daniele 5 :13-29

 **Tangila bana baverse yai :**

13 Bo kwisaka kunata Daniele na ntotila. Ebuna ntotila tubaka na Daniele nde : « Ketu nge Daniele, muntu mosi na kati ya Bayuda ...ya mono kwisaka kunata na ntoto ya Yuda ?

14-16 Mono me wa nde nge ke na mayele...nde nge lenda tendula mambu ya kinsweki...Kana nge tanga bisono yai ti kutendula yo...nge ta vanda mpi muntu ya tatu na kimfumu... »

17 Daniele...nde : « Mbote nge vanda na bakado na nge, mbote nge kabila muntu ya nkaka. Kansi mono ke tangila nge mfumu bisono yai. Mono ke tendudila nge yo.

18-21 Nzambi-Mpungu tulaka nkaka na nge...ntotila, Yandi pesaka yandi lukumu ti ngolo. Kansi sambu yandi kumaka lulenda ti ntu ngolo, yandi vandaka kusala makambu na nku. Yo yina Nzambi katulaka yandi na kati ya bantu, ngindu na yandi kumaka bonso ya mbisi...tii kuna yandi ndimaka nde Nzambi-Mpungu ke yalaka bamfumu yonso...

22-23 Ebuna nge, nge me kudikulumusa ve nge mosi, ata nge zaba mambu yai yonso. Nge me tula lulendo na Mfumu ya zulu. Nge me sadila makopa ti babolo yina ya bo botulaka na nzo ya yandi....nge me kumisa mpi banzambi ya (mutindu na mutindu), banzambi ya ke monaka ve, ke waka ve, ke zabaka mpi kima ve. Kansi nge me buya kukumisa Nzambi...

24 Yo yina, Nzambi me tinda diboko yina na kwisa kusonika mambu yai.

25-28 Mambu ya diboko sonikaka, yo yai : 'Mene, mene, tekele, parisini.' ...Ntangu yai, disongidila na yo, yo yai : ...Nzambi me tanga bilumbu ya kimfumu na nge, yandi me sukisa yo....Nzambi me meka nge na kilo..Nzambi me kabisa kimfumu na nge. Yandi me pesa yo na maboko ya bantu ya nsi ya Media ti ya Persia. »

29 Nswalu Baltazare...tulaka (Daniele) muntu ya tatu na kimfumu na yandi.

? Yula bana

 **Bana sala bageste to mwa-senete**

 **Bana yimba ti kina**

8.4 Yo yantikaka kusalama mutindu Daniele tubaka kaka na mpimpa yina. Dariusi, mfumu ya Media, botulaka kimfumu na yandi. Daniele 5 :30-6 :1

 **Tangila bana baverse yai :**

30 Kilumbu yo yina na mpimpa, bo kwisaka kufwa Baltazare...

6 :1 Ebuna Dariusi, ntotila ya nsi ya Media, botulaka kimfumu...

? Yula bana


 **Bana sala bageste to mwa-senete**

 **Bana yimba ti kina**


>< **Kumanisa Malongi :**

Mfumu Baltazare zabaka mpila Nzambi kulumusaka nkaka na yandi, kansi yo me longa

yandi kima ve. Yandi mpi kwenda kutula lulendo bonso yandi vandaka Nzambi, bonso yandi lenda sala konso mambu yandi zolaka. Kansi Nzambi kulumusaka yandi. Yandi katulaka yandi kimfumu. Diboko ya sonikaka na kibaka songaka nde yo salamaka kaka sambu na lulendo ya Baltazare.

 **Devoir sambu na bakristo :**

Bana bakristo, beto tina, tina, tina lulendo. Yo ke pesa Nzambi kiese ve.

 **Invitation sambu na bo ya me yamba Yesu ntete ve :**

O bana, kana nge me zenga ntete ve kulanda Yesu, kana nge me tula Yandi kivuvu ve bonso Mvulusi na nge, kupesa ve nzila nde lulendo kukange nge kuyamba Yandi. Kuyindula nde nge ke na mfunu na Yandi ve, yo kele lulendo ya nene. Nge kele na mfunu na Yandi sambu nge mosi lenda kudigulusa ve. Kaka Yesu Mwana ya Nzambi lenda gulusa nge. Keti nge zaba nde nge me yamba Yandi?

NSUKA YA LESO 8

Leso 9—KIKESA na lombilu.

Daniele 6

I. PREPARATION SAMBU NA MONITEUR-

☉ Kikuma ya Leso :

Bana ta vanda na kikesa kusamba bisika yonso bo kele, ata konso nani kele ti bo.

♥ Verse ya Kulonguka :

Kansi mono, mono ke lomba Mfumu Nzambi Yandi sadisa mono, Yandi muntu ta gulusa mono.

Mpimpa ti mwini, suka ti nkokila mono ke didilaka

Yandi, Yandi ta wa ndinga na mono.

Bankunga 55:17-18

👤 Bankunga ya kwenda nzila mosi ti leso :

Daniele Sambaka Mingi
Nzambi Kuwa na Suka

II. REVISION

† Kuyindula diaka baleso me luta :

Daniele me zenga na ntima nde yandi ta vanda kwikama na Nzambi, ata bambeni me kanga yandi, me kumisa yandi mpika na nsi ya Babylon. Nki mutindu yandi me songa kwikama na yandi na Nzaambi tii ntangu yai?

(Yandi me buya madia ya mfumu, yandi me buya kusamba kiteki ya mfumu, etc.)

III. KULONGA LESO YAI

➔ Kuyantika Leso:

Mulandi vandaka na kuvutula matondo na Nzambi konso ntangu, na ntwala ya kudia. Yandi monaka mbote kutonda Nzambi sambu na madia ti sambu na bampila yonso Nzambi me sakumuna yandi. Ntangu yandi vandaka kudia sikamosi ti bampangi na yandi ya nzo-nkanda, yandi sambaka Nzambi na ntwala ya kudia, bonso vandaka kifu na yandi.

Mulandi salaka mpidina konso lumbu, kansi lumbu mosi, ndambu ya bana yantikaka kuseka yandi.

“Tala yandi, mwana ya ecodim,” bo sekaka. “E Mulandi, kana nge kangula meso na nge ve, muntu ta yiba madia na nge!”

Mulandi zolaka ve mpila bo sekaka yandi, kansi yandi vutulaka kima ve. Kaka yandi landaka kusamba Nzambi. Kansi lumbu mosi, ntangu yandi vandaka kusamba, mwana mosi bakaka madia na yandi. Na sika na yo, yandi tulaka dikototo mosi ya nene. Yo pesaka Rolandi shok ya nene. Na nima na yo, Mulandi tondaka Nzambi diaka ve sambu na madia na yandi. Bana vandaka kuseka yandi diaka ve, kansi na nsi ya ntima, Mulandi vandaka kiese ve. Yandi vandaka na mawa ti na nsoni.

Mambu bonso yai salamaka na nduku na beto ya Bible, Daniele. Na bahistoire ya beto me mona dezia, Daniele vandaka ya bamvula mingi ve. Yandi zingaka na mpila mosi ya kwikama na Nzambi luzingu na yandi yonso. Na histoire ya bubu, Daniele me kuma muntu ya bamvula mingi. Keti yandi landaka kaka kuvanda na kikesa kulanda Nzambi kukonda nsoni ?

🏠 Malongi ya nene ya leso yai (developpement) na banti 5 :

9.1 Ntotila ya mpa vandaka kuyala, ti Daniele vandaka na kisalu ya nene na kimfumu na yandi. Baguvernere ya nkaka wilaka Daniele kimpala, yo yina bo sosaka mpila kufunda yandi. Kansi kufunda yandi vandaka mpasi sambu yandi vandaka kwikama mingi. Daniele 6:1-4

📖 Tangila bana baverse yai :

6:1 Ebuna Dariusi, ntotila ya nsi ya Media, botulaka kimfumu na bwala Babilone....

3 Yandi solaka Daniele ti bantu ya nkaka zole na kutalaka baguvernere yango sambu kisalu na yandi kubeba ve.

4 Ntama ve ntotila monaka nde Daniele me luta bantu yina ya nkaka zole ti baguvernere yonso na kusala kisalu mbote....Yandi yindulaka na kutula yandi na kutalaka bisalu yonso na kimfumu na yandi.

? Yula bana

- Nki me soba (changer) na nima ya ntangu? (Daniele me nuna, ti nsi ya Babilonia me zwa ntotila ya mpa, muntu ya dikanda ti nsi ya mpa.)

✍ Bana sala bageste to mwa-senete

👤 Bana yimba ti kina

9.2 Baguvernere ya nkaka wilaka Daniele kimpala. Yo yina bo zolaka kufunda yandi. Bo pusaka mfumu kutula nsiku nde bilumbu 30, bantu lomba kaka na yandi. Daniele 6 :5-10

 **Tangila bana baverse yai :**

5 Ntangu yai bantu yina ya nkaka zole... sosaka mpila ya kukanga Daniele na mambu ya mbi na kusalu na yandi, kansi bo kukaka ve sambu Daniele vandaka ...kusala ata mambu mosi ya mbi ve na kusalu na yandi.

6 Bo tubanaka bo na bo nde: “Kana beto kanga yandi ve na mambu yina me tadila Nzambi na yandi, beto ta mona ve ata kima mosi ya mbi ya kufundila yandi.”

7-8 Yo yina bo kwendaka kutuba na ntotila nde: “Mfumu Dariusi....beto me wakana na kupesa nge ngindu yai: Tula nsiku nde bilumbu 30 ya mvimba ata muntu mosi ve lenda lomba konso kima yina na konso nzambi to na konso muntu yina, kaka na nge mfumu. Muntu yina ta landa nsiku yai ve, bo fweti losa yandi na dibulu ya bantambu (bankosi).

9-10 Ebuna mfumu, basisa nsiku yai, tula yo diboko na mpila nde muntu lenda katula yo ve, mutindu ke vandaka bansiku na beto bantu ya Media ti ya Persia.” Ntotila Dariusi salaka mutindu bo tubaka.

? **Yula bana**

- Sambu na nki bambeni monaka mpila ve kufunda Daniele na kusalu na yandi ? (Yandi vandaka kwikama kaka.)
- Nki ta vanda ndola kana muntu samba nzambu to muntu ya nkaka ? (Bo ta losa yandi na bantambu.)

 **Bana sala bageste to mwa-senete**

 **Bana yimba ti kina**

9.3 Daniele landaka na kwikama yonso kusamba Nzambi, kukonda nsoni, kukonda kubumbana. Yo yina, bantu ya kimpala kwendaka nswalu kufunda yandi na ntotila. Daniele 6:11-13

 **Tangila bana baverse yai :**

11 Ntangu Daniele waka nsiku yina, yandi kwendaka na nzo. Na shambre na yandi...kuvandaka na bafenetre ke tala na ndambu ya Yeruzalemi. Daniele vandaka na kifu ya kukangula bafenetre yina ti kufukama sambu na kusamba Nzambi mbala tatu konso kilumbu. Na kilumbu yai mpi yandi salaka mutindu mosi.

12 Bambeni na yandi monaka yandi ke samba Nzambi ngolo.

13-14 Ebuna bo kwendaka kufunda yandi na ntotila nde:“Daniele... ke zitisa nge ve, mfumu...yandi ke samba kaka Nzambi na yandi mbala tatu konso kilumbu.”

? **Yula bana**

- Ntangu Daniele zabaka nsiku ya mfumu, yandi salaka nki ?

(Yandi landaka kusamba kaka kiteso mosi.)

 **Bana sala bageste to mwa-senete**

 **Bana yimba ti kina**

9.4 Ntotila vandaka na kiese ve, kansi bo losaka Daniele na dibulu ya bantambu. Daniele 6:15-26

 **Tangila bana baverse yai :**

15 Ntangu ntotila waka mambu yai, yandi monaka mpasi mingi na ntima...(kansi yandi) songaka bantu na yandi na kwenda kusimba Daniele ti kulosa yandi na dibulu ya bantambu, Yandi tubilaka Daniele nde: “Nzambi na nge yina ya nge ke sadilaka ntangu yonso, Yandi gulusa nge.”

24Bo basisaka yandi, bo monaka ata mputa mosi ve na nitu na yandi sambu yandi tulaka ntima na Nzambi.

25 Ntangu yai ntotila tubaka nde: Bantu yonso yina fundaka Daniele....Bo losaka bo na dibulu; ntangu bo me kuma ntete ve na nsi ya dibulu, bantambu ...buka-bukaka mikwa na bo yonso.

26 Ebuna ntotila Dariusi sonikilaka bantu yonso...nde:bo fweti (zitisa) Nzambi ya Daniele....

? Yula bana

- Bo salaka nki na Daniele ?
(Bo losaka yandi na dibulu ya bantambu.)

✍ Bana sala bageste to mwa-senete**👂 Bana yimba ti kina**

9.5 Na suka yonso, ntotila kwendaka nswalu kumona nki mutindu Daniele. Daniele vutulaka nde Nzambi me tinda wanzio na Yandi kugulusa yandi. Daniele 6:19-24

📖 Tangila bana baverse yai :

19-20 Ntotila vutukaka na nzo na yandi; mpimpa yina ya mvimba...yandi lalaka ve...Na suka-suka ntotila...kwendaka ntinu na dibulu ya bantambu.

21 ...yandi bingaka Daniele na mawa yonso nde: “Daniele, muntu ya Nzambi ya moyo! Keti Nzambi yina ya nge ke sadilaka ntangu yonso kukaka kugulusa nge na bantambu?”

22-23 Daniele vutulaka nde: “Mfumu...Nzambi tindaka wanzio na Yandi. Yandi kangaka minoko ya bantambu sambu bo sala mono kima ve....

? Yula bana**✍ Bana sala bageste to mwa-senete****👂 Bana yimba ti kina****>|< Kumanisa Malongi :**

Daniele zolaka Mfumu Nzambi. Yo yina, konso lumbu, yandi sambaka Nzambi mbala tatu. Yandi waka nsoni ve kusamba. Yo yina, yandi kangulaka fenetre na yandi, ti yandi sambaka luse na Yerusalemi, bwala ya yandi zolaka mingi. Daniele zabaka nde ntotila me tula nsiku nde bilumbu 30, muntu lenda ve lomba kima na muntu to nzambi ya nkaka, kansi kaka na ntotila. Yandi zabaka ndola ya lufwa na dibulu ya bankosi. Kansi, yandi me zenga kaka kusamba Nzambi.

Ntangu bo losaka yandi na dibulu ya bankosi, Nzambi tindaka wanzio kukanga minoko ya bankosi. Na nsuka ya mambu yina yonso, ntotila pesaka ndola na bambeni ya Daniele ya

salaka lukanu kukanga yandi, ti ntotila pesaka lukumu na Nzambi!

✋ Devoir sambu na bakristo :

Keti nge ta vanda kwikama na bisambu bonso Daniele? Ata bantu ya nkaka lenda mona nge? Ata muntu ya nkaka kuseka nge? Keti nge ta yantika kuvanda kwikama na bisambu kaka na mposho yai ke kwisa?

✝ Invitation sambu na bo ya me yamba Yesu ntete ve :

Kusamba kele mbote mingi sambu na bakristo, kansi ata nge samba konso lumbu, yina ta gulusa nge na masumu ve. Kuguluka, nge fweti balula ntima. Yai zola tuba nde nge mona mawa sambu na masumu na nge na mpila nde nge zola kuyamba yo. Nge fweti yamba Yesu bonso Mvulusi na nge, ti kota na nzila na Yandi Kana nge me tula ntima na Yesu ntete ve, kisambu ya ntete ya Nzambi zola kuwa na nge kele kisambu bonso yai, na ntima na nge yonso:

“Tata Nzambi, mono kele nkwa-masumu, kansi mono kwikila na Yesu, ti mono ndima Yandi bonso Mvulusi na mono. Lolula mono, kota ntima na mono, ti kitula mono mukristo sesepiyai, na zina ya Yesu. Amen!”

Kana nge zola mono kusamba ti nge to kusadisa nge na mambu yai, kaka songa mono na nima ya classe. Mono ta vanda na kieshe mingi kusadisa nge.

NSUKA YA LESO 9

Leso 10-- Visio ya Daniele— Bimfumu ta nwana, Muntu ya Mbi ta yala fioti, kansi Nzambi ta yala na nsuka.

Daniele 7

I. PREPARATION SAMBU NA MONITEUR-

☉ Kikuma ya Leso :

Bana vanda na kikesa kulanda Nzambi, ata konso mambu ke salama na ntoto, sambu beto bakisa nde Nzambi zaba yonso ti Nzambi ta nunga na nsuka.

♥ Verse ya Kulonguka :

Ntangu yai, Yandi (Yesu) bakaka kiyeka, lukumu ti ngolo ya kimfumu na mpila nde bantu yonso ya nsi-ntoto, ata bo kele nki dikanda to nki ndinga, bo sadila Yandi. Ngolo na Yandi ti kimfumu na Yandi, yo ta mana ve tii kuna... Daniele 7 :14

👁️ Bankunga ya kwenda nzila mosi ti lesu :

Ya' Kele Mfumu ya Bamfumu
Ya' Ke na Ntoto Yonso na Maboko

II. REVISION

† Kuyindula diaka baleso me luta :

Na lesu me luta, beto monaka nde mfumu tulaka nsiku ya kwendaka nzila mosi ve ti ndinga ya Nzambi. Yo kangaka bantu nzila kusamba Nzambi. Kansi Daniele zabaka nde beto fweti lemfuka na Nzambi kuluta bantu. Yandi landaka kaka kusamba Nzambi kukonda nsoni. Bo pesaka yandi ndola ya lufwa. Bo losaka yandi na kati ya bankosi ya makasi. Kansi Nzambi lundaka yandi, yo yina, bo salaka yandi mbi ve.

III. KULONGA LESO YAI

➔ Kuyantika Leso :

Beno ta bambuka nde Nzambi pesaka Daniele ngolo kubakisa mambu ya mbono-meso. Beto me mona mpila Daniele tendulaka bandosi ya Nzambi pesaka mfumu ya Babilonia. Bubuyai beto ta mona ndosi ya Nzambi pesaka na yandi mosi, Daniele.

🏠 Malongi ya nene ya lesu yai (developpement) na banti 4 :

10.1 Nzambi songaka Daniele bimfumu ya ta kwisa na nsi-ntoto na ntangu ya nsuka. Yandi songaka konso kimfumu na mbisi ya vandaka symbole na yo. Nzambi zaba mambu yonso ya ta kwisa to salama. Daniele 7 :1-8

📖 Tangila bana baverse yai :

1-3 ...Mono Daniele...mono monaka mambu na mbona-meso....Mono monaka bambisi iya ya nene ke basika na masa...

4-5 Mbisi ya ntete...bonso ntambu...mapapu bonso kumbi-kumbi....Mono monaka mbisi ya zole...bonso ours, me talama ...bampanzi tatu na munoko...

6-7 ...Mbisi ya nkaka kumonika bonso nkoi...mapapu ya ndeke, ba-ntu iya. Bo me pesa yo kiyeka na kuyala. ...Mbisi ya iya, mbisi mosi ya boma...ngolo mingi... Yo vandaka na bibongo 10....kakibongo ya fioti ke basika na kati ya bibongo yina ya nkaka... Kakibongo yango....kutula lulendo.

? Yula bana

- Daniele monaka nki mambu ya boma na ndosi na yandi ?
(Bambisi ya makasi)
- Bambisi yai songaka nki ?
(Bamfumu to bimfumu ya ta yala na ntoto.)

✍️ Bana sala bageste to mwa-senete

👁️ Bana yimba ti kina

10.2 Nzambi songaka Daniele nde na nsuka, Nzambi mosi ta yala. Bimfumu yonso ti mambu yonso kele na maboko na Yandi. Daniele 7 :9-14

📖 Tangila bana baverse yai :

9 ...mono monaka bo ke tula bakiti ya kimfumu. Ebuna Mbuta-Muntu mosi ya mununu mpenza kwisaka kuvanda na kiti yina mosi. Bilele na yandi vandaka ya mpembe bonso mvula ya neze...Kiti na Yandi ya kimfumu... vandaka kumonika bonso tiya ke pela...

10 tiya vandaka kukatuka na kiti bonso masa. Yo vandaka kupela na ntwala na Yandi. Bantu bamile na bamile vandaka kusadila Yandi...na ntwala na Yandi. Bazuzi yantikaka kukangula mikanda ti kusambisa makambu.

13 Kaka na ntangu yango...mono monaka...muntu....Ebuna bo ke kwisa kunata Yandi na ntwala ya Mbuta-Muntu yina ya mununu.

14 Ntangu yai, Yandi bakaka kiyeka, lukumu ti ngolo ya kimfumu na mpila nde bantu yonso ya ntoto, ata bo kele nki dikanda to nki ndinga, bo sadila Yandi. Ngolo na Yandi ti kimfumu na Yandi, yo ta mana ve tii kuna...

? Yula bana

- Mbuta-Muntu lenda vanda nani ? Nani zingaka na ntwala ya muntu ya ntete ? (Nzambi)
- Muntu ya kwisaka na ntwala ya Nzambi, ya Nzambi pesaka kiyeka ya ta mana ve—yandi nani ? (Yesu)

 Bana sala bageste to mwa-senete

 Bana yimba ti kina

10.3 Na bilumbu ya nsuka, muntu ya mbi ta telama ya ta tuba bandinga ya vwenza Nzambi. Yandi ta pesa mpasi mingi na bantu ya Nzambi bamvula 3 ti demi. Daniele 7 :15-21 & 23-25.

 Tangila bana baverse yai :

20-21 Mono zolaka kuzaba...disongidila ya bibongo kumi...ti kakibongo yina kwisaka kubasika na nima...yo vandaka kutuba... lulendo... mono monaka nde kakibongo yina ke nwanisa bantu ya Nzambi, yo ke bedisa bo.

24-25 Bibongo yina kumi kele bantotila kumi yina ta kwisa kubasika...ebuna ntotila ya nkaka ta kwisa kubasika...Yandi ta finga Nzambi-Mpungu. Yandi ta monisa bantu ya Nzambi mpasi...bantu ya Nzambi ta vanda na maboko na yandi bamvula tatu ti ndambu.

? Yula bana

- Muntu ya mbi ya ta kwisa na nsuka ya bilumbu, nki mbi yandi ta sala ? (Kufinga Nzambi ti kumonisa bantu ya Nzambi mpasi)

 Bana sala bageste to mwa-senete

 Bana yimba ti kina

10.4 Ata bantu nwana na ntoto, ata bo pesa bakristo mpasi, Kimfumu ya Nzambi ta nunga na nsuka, ti Yesu ta yala na ntoto. Daniele 7 :22 & 26-27

 Tangila bana baverse yai :

22 Kansi Mbuta-Muntu yina ya Mununu ke kwisa kunwanina bantu ya Nzambi-Mpungu ti kunungisa bo. Ntangu me lunga bantu ya Nzambi na kubaka kimfumu.

26 Kansi bazuzi ya zulu ta yantika kusambisa makambu. Bo ta botula yandi kimfumu ti kufwa yandi kimakulu.

27 Ngolo ti lukumu ya bimfumu yonso ya nsi-ntoto, Nzambi-Mpungu ta pesa yo na bantu na Yandi. Kimfumu na bo ta mana ve...

? Yula bana

- Keti muntu ya mbi ta yala ntoto tii kuna ? (Ikele ve. Bo ta sambisa yandi ti botula yandi kimfumu.)
- Nani ta baka kimfumu na nsuka ti yala tii kuna ? (Nzambi-Mpungu)

 Bana sala bageste to mwa-senete


 Bana yimba ti kina

>|< **Kumanisa Malongi :**

Nzambi songaka Daniele na ndosi mambu ya ta salama na ntangu ke kwisa, tii na nsuka ya ntoto. Bimfumu ya nkaka ta yala na ntoto. Bo ta nwana bo na bo. Na bilumbu ya nsuka, muntu ya mbi ta kwisa ya ta pesa bantu ya Nzambi mpasi. Ata mbi kusalama ntangu yai, Daniele lenda sadila Nzambi na kikesa, sambu yandi bakisa nde Nzambi zaba na ntwala yonso ya ta salama. Yonso kele na maboko na Yandi.

 **Devoir sambu na bakristo :**

Beto bakristo, beto vanda na boma ve. Yonso ya salama, ata ya mbote to ya mbi, yo kele na maboko ya Nzambi na beto. Yandi ta nunga na nsuka. Beto sadila Yandi na kikesa.

 **Invitation sambu na bo ya me yamba Yesu ntete ve :**

Nzambi lunga kubaka lukumu yonso. Yandi salaka beto, ti Yandi ta yala na nsuka ya mambu yonso. Bimfumu yonso ya ntoto kele na diboko na Yandi.

Kansi probleme na beto kele nde beto me pesa Yandi luzola na beto yonso. Bible ke songa nde beto me sosa nzila ya Nzambi ve, kansi nzila ya beto mosi. Yo yina, beto me sala mambu mingi ya me pesa Yandi kiese ve.

Kansi Yandi zolaka beto, bantu ya mbi. Yandi tindaka Mwana na Yandi sambu na kugulusa beto. Yesu zingaka ntangu yonso na mpila ya pesaka Tata na Yandi kiese. Yandi salaka kaka mbote. Bantu ya kimpala tulaka Yandi na zulu ya kulunsi. Bo banzaka nde bo me manisa Yandi. Kansi bo bakisaka ve nde Yandi kwisaka sambu Yandi lenda kufwa bonso nkailu to makabu sambu na kufuta mfuka na masumu na beto.

Sambu Yandi vandaka Mwana ya Nzambi, Yandi telamaka na lufwa. Bantu mingi monaka Yandi na nwala Yandi tombukaka na zulu, kuvutuka na Tata na Yandi diaka.

Yandi tubaka nde bayina ke mona mpasi sambu na masumu na bo, bo lenda balula ntima. Bo bika nzila ya masumu, bo yamba Yesu na maboko zole. Yandi pesa bo ntima ya mpa ya zola kulanda nzila ya Nzambi. Yandi lolula mambu yonso ya mbi ya bo me sala.

Kana yai kele nge, nge lenda balula ntima na Yesu bubuyai. Nge lenda binga Yandi, kulomba Yandi kugulusa nge.

NSUKA YA LESO 10

Leso 11--Wanzio Gabriele songaka Daniele ntangu ya kukwisa ya Mesia

Daniele 9

I. PREPARATION SAMBU NA MONITEUR-

☉ Kikuma ya Leso :

Beto bakisa nde beto ke na mfunu ya Mvulusi sambu beto me landa ve nzila ya Nzambi, ti beto zaba mbote-mbote nde Mesia yina kele Yesu.

♥ Verse ya Kulonguka :

Kansi ntangu kilumbu yina ya Nzambi tulaka, yo lungaka, Nzambi tindaka Mwana na Yandi... Galatia 4 :4a

👤 Bankunga ya kwenda nzila mosi ti leso :

Mwana Yina Nani ?

Ya' ke na Ntoto Yonso na Maboko

II. REVISION

† Kuyindula diaka baleso me luta :

Nzambi pesaka Daniele mayele kubakisa bandosi. Yandi songaka Daniele mambu mingi na bandosi na yandi mosi. Yandi songaka yandi bimfumu ya ta kwisa ti mpasi ya ta salama. Kansi mambu ya nene Nzambi songaka yandi vandaka nde na nsuka, Nzambi ta yala mvu ya mvu.

III. KULONGA LESO YAI

➔ Kuyantika Leso :

Bubuyai beto ta mona mambu ya nkaka ya nene-nene ya Nzambi songaka Daniele.

🏠 Malongi ya nene ya leso yai (developpement) na banti 4 :

11.1 Nzambi bambukisaka Daniele nde Yandi ta bika Yerusalem kuvanda mpamba bamvula 70.

Daniele 9 :2

📖 Tangila bana baverse yai :

9 :2 ...mono Daniele vandaka kutanga mikanda ya Nzambi ti kuyindula bamvula 70 ya bwala

Yeruzalemi fweti bikana mayumbu, mutindu Mfumumu Nzambi tubaka na profete Yeremia.

? Yula bana

✍ Bana sala bageste to mwa-senete

👤 Bana yimba ti kina

11.2 Daniele sambaka Nzambi ti ndimaka masumu na yandi ti bantu na yandi Bayuda.

Daniele 9 :3-19

📖 Tangila bana baverse yai :

3-4 Ebuna mono sambaka Mfumumu Nzambi ngolo...mono buyaka kudia sambu na kusamba Yandi...ti kundima masumu ya bantu na mono nde :...

5 Beto me salaka masumu. Beto kele bantu ya mbi. Beto me buyaka na kusala mambu ya Nge songaka beto...nzila ya mbote ya Nge songaka beto.

6-8 Beto wilaka ve...baprofete....Nge vandaka na raison na kupesa beto ndola ya mingi mpidiyai. E Mfumumu Nzambi, nsoni kele na beto...sambu beto salaka Nge mbi.

9-10 Kansi Nge...kele mawa mingi. Nge ke lolulaka beto ata beto salaka Nge mubulu. Beto wilaka Nge ve....

11-13...Yo yina kusinga yina ya Nge sonikaka ...yo bwilaka beto....kansi tii ntangu yai...beto me mekaka ntete ve na kubika mbi na beto to kulanda mambu ya kieleka sambu na kupesa Nge kiese.

16-17 ...pardo, kuwila diaka ve Yeruzalemi makasi...Bantu yonso...penepene...bo ke finga yo ti beto bantu na Nge...sambu na lukumu na Nge mosi Mfumumu, yindula diaka nzo na Nge ya bo me fwaka, vutula yo mutindu yo vandaka.

19 ...Mfumumu Nzambi, lolula beto ! ...sadisa beto...sambu na lukumun na Nge mosi !

? Yula bana

✍ Bana sala bageste to mwa-senete

Bana yimba ti kina

11.3 Nzambi tindaka wanzio Gabriele kusonga yandi nde yonso kele na lukanu ya Nzambi.

Daniele 9 :20-24

Tangila bana baverse yai ti somere yai :

21-22 Ntangu mono vandaka kusamba, wanzio Gabriele...kwisaka.... Yandi...nde : « Daniele, mono me kwisa awa na kupesa nge mayele.

Gabriele songaka Daniele nde Nzambi vandaka dezia na lukanu nki ntangu Yandi ta kangula nzila nde bo tunga Yeruzalem diaka. Yandi vandaka na lukanu sambu na bantu na Yandi yonso.

Bana sala bageste to mwa-senete

Bana yimba ti kina

11.4 Nzambi vandaka na lukanu mpi kulolula masumu na bo. Na yo, Gabriele songaka Daniele nki ntangu Mesia ta kwisa. Daniele 9 :25

Tangila bana baverse yai :

25-26 ...Kantu ntangu Nzambi me tuba na kutunga diaka Yeruzalemi tii ntangu mfumu yina ya Yandi me solaka ta kwisa, nge fweti tanga bamvula ...483...na nima, bo ta fwa Yandi...

Galatia 4 :4 ke songa beto nde bu ntangu ya Yandi tulaka lungaka, Nzambi tindaka Mwana na Yandi Yesu kaka mpila Yandi silaka.

? Yula bana

Bana sala bageste to mwa-senete

Bana yimba ti kina

>|< Kumanisa Malongi :

Mambu ya kuluta nene ya Nzambi songaka Daniele vandaka kukwisa ya Mesia. Bamvula 483 na nima bo yantika kutunga Yeruzalemi diaka. Daniele ta mona yo ve, kansi yandi ndimaka yo na lukwikilu.

Devoir sambu na bakristo :

Bana bakristo, nge zaba mpila Yesu me lungisa baprofesi yonso ya Mesia. Yandi mosi ke Mesia. Na mposho yai, keti nge ta songa bantu ya nkaka ?

Invitation sambu na bo ya me yamba Yesu ntete ve :

Daniele zolaka Nzambi mingi, kansi yandi ndimaka masumu na yandi. Bible ke songa beto nde beto yonso me vila nzila ya Nzambi. Beto me buya nzila na Yandi. Beto me sola nzila ya beto mosi. Beto me sala mambu mingi ya Nzambi ke zola ve. Beto kele na makambu ti Yandi. Beto kele na mfunu ya Mvulusi, Mesia. Beto kele na mfunu ya Yesu Kristo, Mwana ya Nzambi.

Kana nge ke mona mawa sambu na mbi ya nge me sala, kana na ntima nge zola kubika nzila ya masumu, kukota na nzila ya Yesu, kaka binga Yandi na ntima na nge. Kaka songa Yandi nki kele na ntima. Yandi ta kuwa nge, sambu Yandi me telama na lufwa, kele na moyo bubuyai. Yandi lunga kugulusa nge.

NSUKA YA LESO 11

Leso 12--Nzambi songaka Daniele nde mambu yonso ya ta kwisa, yo kele na maboko na Yandi.

Daniele 10-12

I. PREPARATION SAMBU NA MONITEUR-

☉ Kikuma ya Leso :

Beto vanda na boma ve, kansi na kikesa, sambu beto bakisa nde Nzambi ta lunda beto bantu na Yandi tii na nsuka.

♥ Verse ya Kulonguka :

... « Mambu yina ya muntu me monaka ve mpi me waka ve, Mambu yina ya muntu me banzaka ve nde yo lenda vanda, Yina mambu mpenza ya Nzambi me yidikilaka bantu yina ke zolaka Yandi. » 1 Korinto 2 :9

👤 Bankunga ya kwenda nzila mosi ti leso :

Mfumum Zaba Nzila na Mono
Ya' ke na Ntoto Yonso na Maboko

II. REVISION

† Kuyindula diaka baleso me luta :

Mbala mingi na mukanda ya Daniele, beto me mona nde Nzambi zaba yonso ya fweti salama na ntoto yai na ntangu ke kwisa. Ee, Yandi ke twadisa yonso. Yandi ke sala luzolo na Yandi ata bantu sala mbote to bo sala mbi, ata bo ndima Yandi to bo buya Yandi. Yandi songaka ata ntangu ya Mesia na Yandi ta kwisa, ti Yesu Kristo kwisaka na ntangu ya Nzambi songaka Daniele. Beto bakristo vanda na boma ve. Nzambi na beto ke yala mvu ya mvu!

III. KULONGA LESO YAI

➔ Kuyantika Leso :

Mbala mingi, Nzambi songaka nki ta salama na bavisio ya bambisi. Bambisi yina songaka bimfumu ya nene ya ta kwisa na ntoto. Mbala mingi, batribu ti bimfumu ya Afrika me songa mpila bo kele na mbisi ya kele bonso symbole. Nge ta mona mwa-kiteki ya mbisi yina na nti ya mfumu, na porte ya

lupangu ya mfumu, etc. Kiteso mosi na bansi ya nkaka ya ntoto, mpi. Yo yina, Nzambi songaka Daniele bambisi ya vandaka kusonga bimfumu ya ta kwisa. Nzambi zabaka yonso ya fweti salama.

👑 **Malongi ya nene ya leso yai (developpement) na banti 2 :** [*Atasio, Moniteur! Malongi kele nda, yo yina beto ta pesa kaka somere ti ndambu bitini ya baverse.*]

12.1 Ata beto mona yo ve, bawanzio ya mbote ya Nzambi ti bamwanzio ya mbi ke nwana. Lombilu na beto ke sadisa bo.

📖 Tangila bana :

Daniele zolaka kubakisa mbote mbona-meso yonso ya Nzambi vandaka kusonga yandi. Yo yina, yandi vandaka kusamba Nzambi ngolo. Nzambi tindilaka yandi wanzio ya kupela, sambu na kupesa yandi kikesa. Wanzio simbaka yandi. Yandi tubaka nde, “*Daniele, Nzambi ke zolaka nge...kuwa boma ve. Nzambi ke wa bisambu na nge katuka kilumbu ya ntete...*” Na kilumbu ya ntete, Nzambi tindaka wanzio ti mvutu. Kansi na nzila, bawanzio ya nkaka ya ke landa Nzambi ve, bo kwisaka kunwanisa yandi. Bo bawanzio ya vandaka kusala na kati ya bamfumu ya nene.

Wanzio simbaka Daniele ti songaka yandi mbala ya zole nde, “*Nzambi ke zolaka nge. Kuwa boma ve...vanda na kikesa.*”

Wanzio songaka Daniele nde yandi fweti vutuka kunwana diaka ti bawanzio ya bamfumu ya nkaka ya nene-nene. Kaka wanzio mosi na zulu na yandi lenda sadisa—wanzio Mishele, ya Nzambi tulaka kukengilaka bantu ya Israele.

? Yula bana

✍ Bana sala bageste to mwa-senete

👤 Bana yimba ti kina

12.2 Nzambi songaka Daniele nde kieleka, ntangu ya mpasi mingi ta kwisa na bilumbu ya nsuka. Kansi Nzambi ta twadisa yonso tii na nsuka.

Nzambi songaka Daniele bimfumu mingi ya ta yala na ntoto, ti mpasi ya fweti kwisa na bilumbu ya nsuku. Kansi Daniele ti bantu yonso ya Nzambi, bo lenda vanda na kikesa. Nzambi kele na mambu yonso na maboko na Yandi. Daniele ta zinga ve kumona bima mingi ya Nzambi me songa yandi. Kansi ata yandi kufwa, Nzambi ta tedimisa yandi ti bantu yonso na Yandi na kilumbu ya nsuka.

Daniele yulaka Nzambi, « Mfumu, nki mutindu mambu yai yonso ta suka ? Yandi vutulaka nde : « Kumona mpasi ve...nge Daniele, kwenda kaka na ntswala tii kuna na nsuka. Nge ta fwa, kansi na kilumbu ya nsuka, nge ta telama na kubaka matabisi na nge. »

? Yula bana

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Nzambi songaka Daniele nde bawanzio kele kusala konso ntangu sambu na kulungisa luzolo ya Nzambi. Ata bampeve ya mbi kunwanisa bo, bo lenda nunga ve. Nzambi fweti nunga na nsuka, ti beto bantu na Yandi lenda sadisa na lombilu na beto.

Ata beto kufwa bonso Daniele, yina mpi ta sala beto kima ve, sambu Nzambi ta tedimisa bantu na Yandi yonso na kilumbu ya nsuka. Na nsuka, beto ta baka matabisi na diboko ya Nzambi. Beto ta vanda ti Yandi na Kimfumu na Yandi mvula na mvula.

Devoir sambu na bakristo :

Bana bakristo, vanda na boma ve. Vanda na mawa ve. Beto ke tula Nzambi ntima nde Ndinga na Yandi kele kieleka. Yandi ta yala ya mvula na mvula.

Invitation sambu na bo ya me yamba Yesu ntete ve :

Kansi nge, kana nge me tula ntima na Yesu Kristo ntete ve, nge kele muntu ya Nzambi ntete ve. Mambu ya kiese ke kinga nge ve, kansi mambu ya mawa. Nzambi salaka nge. Yandi pesaka nge

moyo. Yandi monaka nde nge vandaka na probleme ya masumu. Yo yina, Yandi tindaka Mwana na Yandi Yesu Kristo sambu na kugulusa nge. Yesu fwaka na zulu ya kulunsi sambu na kufuta mfuka ya mbi yonso ya nge. Yandi telamaka na lufwa. Yandi ta pesa nge moyo ya mpa bubu yai kana nge ta balula ntima. Kana nge ta tula vivuvu yonso na Yandi kaka. Binga zina ya Yesu. Songa Yandi nde nge zola kubika nzila ya masumu, kukota na nzila na Yandi. Yandi me sila nde konso muntu yina kwisa na Yandi, Yandi ta buya Yandi ve.

NSUKA YA LESO 12

====NSUKA YA MUKANDA YAI====

***Moniteur, Atasio!** SVP, Kana nge me manisa kulonga baleso yai, bika mukanda to colis ya baleso yai kulala na nzo na nge ve. Bantu ya nkaka kele na mfunu mpi kusadila yo. Kana nge lenda vutula yo na Centre des Materiels ya MCE, nge ta sadisa bantu ya nkaka ya zola mpi kulonga ndinga ya Nzambi.*

Ti kaka na ntangu yina, nge lenda defa materiels ya mpa kulonga na classe na nge ! Bonne collaboration, SVP!
Merci mingi. Mono Mama Lorella